

# Kiyungulu Ya Moto Ya Mayele

Jeffersonville, Indiana USA

65-0822E

1 Natondi yo, Ndeko Mann. Namoni ete omemi ndeko mobali moko. Nkolo ápambola yo. "Makambo nyonso ekoki kosalema, ndima kaka." Tóbondela.

E Nzambe, ya solo mpenza yango nde mposa ya mitema na biso na mpokwa oyo, bobele kondima. Wana tosangani awa kati na ndako na losambo na mpokwa oyo, moi mozali kolala na elimwelo na ntango, tobondeli, Nzambe molingami, ete Ópesa biso nzela ya kososola boni tobelemi na ngonga oyo moi mokolala likolo na ntango; ekomi na suka ya mobembo na yango. Ntango ekomi mosika. Mpe tozali lisusu kokanisa mokolo moko, wana ngonga esiklaki koleka, basali mobembo mibale basengaki na Yo ete okota mpe Otikala elongo na bango. Mpe, na nsima Yo moko Omimonisaki epai na bango na kolimboláká Liloba na yo mpe na kotikáká bango bamona ete Klisto asengelaki yambo komona mpasi na makambo nyonso wana.

Boye tobondeli, e Nzambe, ndenge mokolo esili mpenza koleka, ete Óya kati na bandako na biso mpe Óbika elongo na biso, mpe Ólimbolela biso Liloba, Nkolo, oyo tosimbi na boboto nyonso lokola eloko ya motuya kouta na Yo, lokola likabo kati na mitema na biso. Tika ete toleka likolo na Yango te; tika ete ntango nyonso tomemya Yango na mitema na biso mobimba.

Totondi Yo mpo na oyo osalaki na ntongo mpo na baoyo bazali na lopitalo, mpe oyo Osáláki mpo na mwana mobali moke ya Ndeko Capps oyo alalaki, pene na kufa, mpe sikawa talá ye oyo awa kati na liyangani na mpokwa oyo. Totondi Yo mingi, Tata, mpo na makambo nyonso oyo!

Tiká, Nkolo, ete tokoka koyeba ndenge nini tosengeli kopesa Yo masanzoli. Tozali bobele ... Elekeli lisosoli na biso mpo na koyeba ndenge ya kopesa Yo masanzoli. Kasi, Nkolo, Yambá mitema na biso lokola bilembo ya matondi, ete tolingi Yo. Mpe ntango to—tolingi kosala oyo ezali malamú, Lakisa biso oyo tosengeli kosala. Tosengi yango na Nkombo na Yesu. Amen.

Bokoki kofanda.

2 Mbote na bino nyonso oyo bozali kati na losambo oyo etondi mpenza na mpokwa oyo mpe na bino oyo bozali kolanda na nzela ya telefone na mboka mobimba. Balobi ete bazali lisusu kolanda na nzela ya telefone na mpokwa oyo.

Nalikyi ete mwasi na ngai mpe azali kolanda. Naino nabengi ye te, na bongo nakobenga ye na sima ya liyangani oyo.

Mpe tozali na lokasa moko awa elobi ete na ntongo ya lelo, ndeko ya Ndeko Jackson ... to tata na ye oyo azalaki na mpasi makasi, oyoki mpenza malamú, ete akoki ata kozonga epai na ye lobi.

Mwana mobali moke ya Ndeko Capps, oyo abengaki ngai na mpokwa mosusu wana na ntina na ye , nayebi te soki Ndeko Capps azali kati na bayangani to te, kasi, mwana na ye azalaki kobela makasi.

Mpe esalemaki ete Joseph ná ngai, tozalaki kuna na—na esika oyo babetaka masasi, mpo na babongisa mondóki na ngai. Nayebisaki bino na ntina na yango na mpóso eleki. Mpe ye akozala mpenza mobeti masasi ya solo-solo. Bongo alingaki koyeba malamú ete nakoyebisa Gary ná Larry makambo oyo asalaki. Mpe ayebisaki ngai, wana autaki kozonga ... Nalobaki: "osengeli kotelema mpe—mpe koyebisa yango na Ndeko Gene Norman."

Alobaki: "Telema mpe yebisa yambo Billy," ndeko na ye ya mobali.

Sima na ye kolakisa ye lolenge abetaki masasi malamú, alobaki: "Sikawa kotungisa ngai lisusu te." Bomoni?

3 Mpe bobele ntango tokomaki kuna, ee, babengaki na telefone, mpe Billy akotaki mbango mpo na kotuna ... Nalobaki: "Ekoki kozala moto moko ya bokono nde azali kobenga." Bongo tokotaki bobele na ntango yango, mpe ezalaki Ndeko Capps. Mpe mwana mobali moke yango azalaki na mpasi na libumu, mpe libaku ya kobika ezalaki mpenza moke. Bongo Nkolo abikisaki ye. Na mpokwa moko alobaki ete azali kotungisama na mwa mpasi moko, Madame Wood azalaki koyebisa ngai. Mpe tozalaki kokende na lombangu, mpe ngai ... Nalobaki: "Madame Wood, ntango ekómi esili koleka sikawa, ngonga ya zomi, nandimi te ete bakotika ngai nakota kuna na lopitalo." Nalobaki: "Nazali kozonga na ndako mpe nakokanga bobele ekuke." Bongo nakendeki na ndako mpe nabondelaki. Mpe bayebisi ngai ete elenge mobali yango azali kati na liyangani na mpokwa oyo. Bongo, tozongisi matondi mingi mpo na yango. Mpe tozali na botondi.

Sikawa, tosimbi naino makasi; naino toyoki te. Soki Ndeko Leo Mercier ná Ndeko mwasi Mercier bazali koyoka, tozwi naino sango ya tata na bino te. Tozali kolikya ete tokoyoka na mwa ntango moke ndenge azali. Kasi nayebi malamú ete akoyoka malamú, na bongo biso tozali na elikya epai na Nzambe na Nguya nyonso, mpe tondimi ete Akotala likambo ya mobange mosantu molingami oyo, mobundi oyo ya kala,

moteyi ya Nsango Malamu.

4 Sikawa, oh, makambo ezali mingi oyo tosengeli kosala, mpe ntango mpo na kosala yango ezali mpenza mokuse, na bongo totia bobele makasi na biso nyonso sikawa na oyo tokoki kosala mpo na Nkolo na biso.

Nakómaki mwa moke liboso na ntango. Mpe na—nazalaki komiyoka malamau mpenza te. Nalembaki, nalembaki mpenza, mpe nalalaki mwa moke na nsima na nzanga oyo. Ata moke te ... Naino kutu nalie bilei ya mpókwa te. Na bongo na—nakotaki na ndako mpe nalalaki sima na nzanga mobimba. Nazalaki komiyoka mabe, na bongo nalalaki wana. Mpe na sima nabandaki kobondela, bongo nayokaki malamau. Mpe natelemaki, nalataki bilamba na ngai, mpe nayaki na losambo.

Na bongo to—tozali kolikia ete Nkolo Yesu Akopambola sikawa molende na biso na mpokwa oyo, lokola na ekólo mobimba tozali komeka kosangana na eteni ya Nzoto na Klisto oyo, ete napesamelaki makoki ya koleisa bampate na Ye. Mpe nakolinga bobele kosala makambo na ndenge nayebi mpenza malamau, na kopesáká bilei malamau oyo nayebi mpo na bampaté.

Mpe nazali kozela na motema likolo ntango oyo tokoki kosangana esika moko mpo na koteya likolo na Malozi Nsambo wana, mpe na Bakopo Sambo, mpe likolo na Bakelelo, mpe bongo na bongo. Yango nyonso ezali kokokisama na lisanga moko. Yango nde ntina ekozwa biso pene na póso moko, mikolo zomi to koleka, mpo na kosilisa yango na likita bobele moko, soki ekokoka. Nakanisi mpenza ete ekokoka.

5 Sikawa, bato mingi kati na bino bautaka mosika. Nabwaki miso kuna, mpe namonaki eleki mwa ntango, bato ya Tucson. Madame Sothmann, namoni ete Ndeko Fred akomaki malamau. Namonaki ye kati na bayangani na ntongo ya lelo. Mpe nabanzi ete ezali Ndeko Don Ruddell nde afandi pembeni na ye kuna na sima, na mpokwa oyo. Nasepeli komona Ndeko Don awa. Mpe Junior, Junior azali awa to azali na losambo na ye? Nabanzi bazali kolanda na telephone na losambo na bango, na mpokwa oyo.

Na boye, bino nyonso bandeko, tozali na esengo mingi ya kozala elongo na bino na mpokwa oyo, mpe totieli Nkolo motema ete mokolo moko toko, ntango bomoi na biso ekosila mpe pole moke ya bomoi oyo ya kufa ekobanda kokita kino kosila, tokobanga mabe te, mpo na kati na—na ...

6 Nauti kozwa nsango mpo na bino, kuna na—na ... na Arizona, na Prescott. Ndeko Coggins abimi na lopitalo. Na yango tozongisi matondi mingi mpo na yango. Malamau. Ezali malamau. Bongo, tozongisi matondi mingi mpo na yango. Ndeko mwasi Mercier, tata na yo azali koyoka malamau sikawa. Nayoki bobele sima na biso kobondela ete akoyoka malamau. Boye ntango mosusu bazali kolanda; nalikyi ete bazali kolanda; mpe nabanzi bazali kosala yango. Bongo tozongisi matondi mingi mpo na yango, ete ndeko na biso ya mobali azali—azali malamau sikawa, mpe akokoba kokoma malamau. Boye totondi Nkolo mpo na makambo nyonso oyo.

Nazwaki lilombo moko lobi na mpokwa; ndeko molingami moko awa, nakanisi ete azali elongo na biso lelo te. Ndeko mobali moko ya Kentucky, abengaki ngai na ntina na mwana na ye ya mwasi. Libota moko malamau, mpe—mpe elenge mwasi yango bakopasola ye, elenge mama azali na kanser na mokongo. Na bongo to—tobondeli ete Nzambe abikisa elenge mwasi oyo. Nandimi ete Akosala yango, soki tokoki bobele ...

Losambo, biso nyonso elongo, tosangana mpe tobondela mpo na bato oyo, elongo. Yango nde tosengeli kosala, na bomnoko. Ndenge ...

7 Mpe ndenge mikolo ezali kobeleva mpe kopusana, mpe nzela ezali kokoma moke, to—tolingi kozala na boyokani makasi. Oh! la la! tosengeli bobele kozala moto moko, nzoto moko. Tosengeli kotambola elongo, kobosanáká masumu na biso bamoko na bamosusu ná mpe bokeseni na biso, kokangamáká bobele elongo ndenge tozali komona Mokolo yango kobeleva. Kosanganáká elongo na bomoko mpe na motema moko. Mpe soki ndeko mobali moko, ndeko mwasi moko abimi na nzela, na lolenge moko to mosusu, bondela bobele mpo na moto yango, mpe na bolingo, kolendisanáká moko na moko. Bo—botika ata moke te ete moko na bino ábunga nzela. Botikala elongo. Mpe, soki bokokoka, bóbakisa likolo na yango, na ntango nyonso, na ngonga nyonso.

8 Ndeko Neville, nazali na lilombo na yo awa mpo na Ndeko Wright, Ndeko George Wright oyo afandi awa. Tozali na esengo mpo ete Ndeko Wright ná Ndeko mwasi Wright, awa ... Elenge mwasi Edith, ngai ... Mokolo moko ntango tokozonga, tokolinga kozala na mwa liyangani moke ya ekaniseli awa.

Nazongaki na ntango te mpo na komona Edith ntango akendeki. Kasi, Ndeko Mwasi Wright, ozali komikanisela ndoto oyo amonaki eleki pene na mibu mibale? Mpe nayebisaki yo na ntango wana, nalobaki: “Ezali ete elenge mwasi moke Edith akotikala lisusu na biso ntango molai te sikawa,” mpo ete Nkolo asilaki kotalisa ete azalaki kokende, na nzela ya ndoto oyo alotaki. Bongo nazwaki ndimbola na yango, ezalak ete alingaki kokende kokutana na Nzambe. Pene na mibu mibale na sima, akendeki kokutana na Nzambe. Sikawa azali kozela ete tata na ye mpe mama na ye bakatisa molongo oyo ezali kokabola kokufa mpe kozanga kokufa.

Nzambe ápambola bino. Nakolinga komona bino nokinoki, soki ekoki kosalema. Boye Nzambe azala na bino mpe ná Shelby, ná bato nyonso. Nakanisaki ete namonaki Shelby na ntongo oyo; nayebaki malamumu te.

Bokoki komona malamumu te likolo awa; plafo ezali na nse mpe ezali ko—kobwaka kongenga ya mwinda boye. Bokoki komona esika, kasi okoki komona bato malamumu te.

9 Sikawa, tokota mbala moko na Liteya. Oyo ezali Nsango oyo nalingi kotanga na Mituya 19: 9 mpe Baefese 5:26. Mpe bino baoyo bobombaka makomi oyo totangaka, mpe bongo na bongo, ee, bokoki kokoma yango.

Mpe sikawa bobosana te, soki bazali kokanga yango na bande ... Nayebi te. Nazali komona moto ata moko te. Iyo, namoni, nazali komona Ndeko Terry kuna na—na nkuku esika bakangaka ba bande. Boye soki oyo ezali kokangama na bande; nazali koloba na batei nyonso, na esika nyonso, na ntango nyonso, oyo ezali mpo na kotelemela to kozanga limemia na malakisi na bino te, oyo eteyami kutu mpo na bampate na bino te. Nsango oyo, ná Mateya mosusu nyonso oyo nazali komema, ezali mpo na losambo na ngai. Ezali mpo na losambo na yo te, loba kaka soki balingi koyamba Yango. Kasi ezali mpo na bato oyo awa.

Bato bazali kosomba ba-bande oyo. Bato na mokili mobimba basombaka yango mpe babetaka yango. Mbala mingi bakomelaka ngai. Mpe ntango nyonso nayanolaka bango, soki bazali bandimi ya lingomba mosusu, “Bómóna mokambi na bino.”

10 Sikawa, bakambi, nalingi ete boyeba likambo oyo: ezali bobele epai na losambo na ngai nde nazali koloba makambo oyo. Mpe nazali na makoki ya kosala yango, mpo ete Molimo Mosantu atye ngai mokengeli likolo na bampate oyo. Mawa na ngai soki nazali te koyebisa bango oyo nazali kokanisa ete ezali Solo, mpe esika nini ezali kouta. Kasi ezali mpo na mokili to mpo na masambo mosusu te. Bino bosala oyo nyonso Nzambe ayebisi bino bósala. Ngai nakoki koyanola mpo na bino te, bino mpe bokoki koyanola mpo na ngai te. Kasibiso banso tosengeli koyanola liboso na Nzambe, mpo na mosala na biso. Yango wana, soki esengeli koyanola mpo na mosala na ngai, nasengeli koteya Yango na lolenge oyo nazali komona Yango, na lolenge oyo Yango emonisameli ngai. Na boye, tika ete eyebana sikawa.

11 Sikawa na Mituya 19:9, tolingi kotanga nkomá oyo, to Likomi oyo, nde.

*Mpe moto oyo azali peto, akokamata mputulu ya ngombeyango, mpe akotya yango libanda na molako na esika moko ya peto, mpe ekobatelama mpo na liyangani ... (botala sikawa) mpo na liyangani ya bana na Yisalaele lokola mai ya kokabola: ezali kopetolama ya masumu.*

Botala malamumu, ezali mpo na moto nyonso te, “epai na eyanganelo na Yisalaele; mai ya kokabola.”

Sikawa na Baefese, mokapo ya 5, mpe kobanda na molongo ya 22.

Basi, botosaka mibali na bino moko lokola na Nkolo.

*Mpo ete mobali azali mokonzi ya mwasi, lokola Klisto azali mokonzi ya Lingomba; mpe Azali mobikisi ya nzoto.*

*Yango wana, lokola Lingomba ezali na botosi epai na Klisto, tika ete basi mpe bázala bongo epai na mibali na bango na makambo nyonso.*

*Mibali, bolinga basi na bino lokola Klisto alingaki Lingomba, mpe Amipesaki mpo na yango.*

Boye, botala likambo nalingi koloba sikawa.

*Mpo Akoka kobulisa yango, kopetola yango na bosukolami na mai na nzela ya Liloba.*

12 Sikawa, mwa maloba moke oyo na mpokwa ya lelo, soki nasengeli kobenga yango motó ya liteya. Mpe nandimi ete bato oyo bazali awa, mpe lisusu baoyo bazali kolanda na nzela ya telefone, baktotala yango mpamba te nakokanisáká ete elobami mpo na kotuka. Atako, kozua likomi lokola oyo, ekoki koyokana lokola kotuka. Motó ya liteya oyo nazali kosalela na mpokwa oyo ezali: *Kiyungulu Ya Moto Ya Mayele*. Ezali koyokana makasi mpenza mpo na liteya, mpo na motei oyo azali kotelemela mingi komela makaya, ete azwa motó ya liteya ya boye: *Kiyungulu Ya Moto Ya Mayele*. Esalamaki, ete, na ntongo wana, ntango nakendeki bokila ya biséndé.

Soki bino baoyo bozali na— kolanda na radio, to na nzela ya telefone, bokokaka komona bilongi ya bato oyo bazali awa na losambo ntango nalobi motó ya liteya na ngai, bolingaki mpenza koseka makasi. *Kiyungulu Ya Moto Ya Mayele*.

13 Ee, nyonso esalemaki epai Banje na Nkolo babimelaki ngai na ntongo moko, mpe biséndé wana bakelamaki na Liloba. Bino nyonso boyebi lisusu ntango likambo yango esalemaki. Mpe lisusu, lokola kaka

likolo ya ngomba epai wapi natelemaki, ezalaki nde ... bobele liboso na ngai koyeya Bileko Nsambo Ya Lingomba, nakendeki bokila mokolo moko liboso ntongo étána. Wana ezalaki na ... Nakanisaki ete moi mozalaki kotana, pene na ngonga ya minei na ntongo. Ezalaki bomomesano te; namonaki Pole yango, bongo nabalukaki mpe wana ezalaki na Bisimbelo Ya Mwinda Nsambo Ya Wolo, etelemaki kuna likolo na ngomba, ná mpe lokola monama ezalaki kobima na batuyo na yango esika mafuta elekaka.

Mbala moko sima na yango, Nkolo Yesu amonanaki na biso. Mpe bobele na ntango yango, nayokaki Mongongo moko oyo elobaki: "Yawe ya Kondimana na Kala Azali Yesu na ya Sika." Mpe Azalaki wana, sima ya mwa ntango, Amonisamaki na nzela ya Bisimbelo Ya Mwinda Nsambo wana Ya Wolo. Botala yango. Bato boni bazali komikanisela liteya yango? Nakomaki yango na nsima ya—ya karto ya—ya masasi oyo nazalaki na yango na libenga na ngai. "Yawe ya Kondimana na Kala azali Yesu na Sika." Nzambe na lola ayebi ete yango ezalaki solo.

14 Ntango nakatisaki esika oyo Ye amonanaki na ngai mwa sima, na ntina na biséndé.

Na nsima ntango nabengaki moninga na ngai ya malamau, Jack Moore, nsima ya mwa basanza, mpo na kotuna; ntango nabandaki koteya Bileko Nsambo Ya Lingomba, Emoniseli 1. Bongo Ye Atelemaki, na bilamba ya mpembe; suki na Ye ezalaki lokola nkunza ya mpaté. Ndenge nini Ye oyo Azalaki bobele na mibu ntuku misato na misato, kasi Azalaki mpembe mobimba? Mpe Ndeko Moore, azali moto malamau, atángá mingi, Moklisto, mpe moto ya mayele mingi, moko na baoyo baleki malamau mpenza oyo nayebi; bongo alobaki: "Ndeko Branham, ezalaki Yesu nsima na Ye kopesamela nkembo. Azali ndenge wana sikawa." Kasi ngai nandimaki yango te. Bongo nakobaki kobondela kino mokolo moko ...

Liboso na ngai kobanda Bileko Nsambo ya Lingomba, nakokaki mpenza kososola malamau mokapo wana ya yambo te. Ndenge nini Moto ya mibu ntuku misato na misato, oyo asekwi kati na nzoto moko wana oyo bantoma bayebaki Ye, bayebaki nani Ye azalaki; bongo ndenge nini akokaki komonana mokolo ya mibu ntango mosusu ntuku mwambe to ntuku libwa, ná mandefu ya mpembe na elongi na Ye, ná nsuki mpembe na motó na ye, mpe ná mandefu na Ye mpembe lokola matandálá?

15 Natangaki awa na Buku ya ... ya Daniele, epai wapi elobami na ntina na ye oyo akendeki epai na "Mokolo ya Mikolo, oyo azalaki na nsuki mpembe lokola nkunza na mpaté." Na nsima namonaki Mokóló ya Mikolo. Azalaki Mokóló wana ya Mikolo, ndenge moko lobi, lelo, mpe libela. Bomoni, ezalaki nde elembo, kuna.

Mpo na nini nsuki mpembe? Na nsima ngai ... Emonanaki lokola Molimo Mosantu azalaki koloba na ngai na ntina na etlilingi ya mosambisi moko ya kala., namoná mbala moko. Boye nakendeki kotala na mambi ma kala; nazongaki kati masolo ya kala ya Biblia mpe nyonso, mpo na koluka koyeba. Mpe basambisi ya kala, lokola nganganzambe mokonzi ya Yisalaele, asengelaki kozala na nsuki mpe mandefu wana ya mpembe lokola nkunza na mpaté, mpo mpembe wana azalaki kolata elingaki koloba ete azalaki na bokonzi eleki likoló ya basambisi na Yisalaele.

Ata kutu lelo, to eleki mwa bankama ya mibu, mbala mosusu mibu nkama mibale, to mbala mosusu kutu moke koleka wana. Basambisi nyonso ys Angleterre, ata soki bazalaki bilenge to mikolo ya mibu soko boni, ntango bakotaki mpo na kosambisa, bazalaki kolata ekoti ya nsuki ya mpembe; mpo na kotalisa ete bokonzi mosusu ezali te, kati na bokonzi yango, likolo na maloba na bango. Liloba na bango ezali liloba ya suka kati na bokonzi. Oyo bango balobi, ekoki kolongolama te.

Mpe na bongo, namonaki yango. Ye Atelemaki wana, atako Azalaki elenge Mobali, kasi Alataki ekoti ya nsuki ya mpembe. Azalaki na mobimba Bokonzi oyo eleki likolo. Azalaki Liloba. Mpe Azalaki na, Alataki ekoti ya nsuki mpembe.

16 Bongo nsima, ntango tosilisaki liteya— yango, nakendeki na elimwelo ya ntango, ezali kuna nde Banje na Nkolo babimelaki ngai mpo na Bilembo Nsambo, mpe emataki na mipepe ( tozali na elilingi na yango awa, mpe na mboka mobimba), Atelemaki wana, mpe Alataki bobele ekoti yango ya Bokonzi oyo eleki likolo. Azali Motó ya Lingomba. Azali Motó ya Nzoto. Ezali na eloko moko te lokola Ye, ata na esika nini. "Asalaki biloko nyonso na nzela na Ye moko. Asalaki biloko nyonso mpo na Ye moko, mpe libanda na Ye eloko moko te ekelamaki." "Azali na bokonzi nyonso na Likolo mpe na nse," mpe nyonso ezali ya Ye. "Mpe litondi na Bonzambe efandi kati na nzoto na Ye." "Bongo Liloba ezalaki Nzambe, mpe akómaki mosuni kati na biso." Mpe Ye nde Amonisaki sekelé mobimba ya mwango nyonso ya lobiko, oyo basakoli ná bato na mayele nyonso balobelaki. Bobele Ye nde Alataki ekoti mpe Azali bokonzi oyo eleki likolo.

17 Sikawa, natelemaki na likolo ya ngomba na ntongo wana, emonanaki lokola biséndé bilekaki wana. Bongo nabandaki kogumbama. Mpe nazalaki wana bobele mwa moke, ntango matiti ebukanaki pembeni na ngai, mpe mbinga ya mobali moko, oyo azalaki na mondóki ya madusu mibale, ayaki, kotamboláká na matiti wana mpe abangisaki ngai makasi mpenza. Nagumbamaki na lobango, nazalaki kobanga koningana, kobanga ete ábéta ngai masasi. Matiti ekobaki koningana, na bongo nafandaki kimia mpenza.

Eséndé moko amonanaki likolo na ngomba, mpe moto yango abetaki ye masasi na mondoki wana ya

madusu mibale. Kasi ezwaki ye te, mpe na bongo eséndé yango akitaki na ngambo mosusu ya ngomba. Namilobelaki: "Boye, tika nalongwa awa na ntango makeléle ezali naino koyokana. Mpe bondóki na ye ezali lisusu na masasi te. "

Boye nabandaki kokita na ngomba, mpe moto yango abetaki masasi kaka liboso na ngai. Yango esalaki ete nábaluka na ngambo oyo. Mpe nabandaki kokita na ngambo mosusu, mpe bondóki ya 22 ebandaki kobeta, bongo masasi ezalaki koleka likolo na ngai. Nalobaki: "Namoni ete ngai nazali na esika moko ya nsomo."

18 Na bongo nabalukaki mpe nakitaki na ebale. Mpe namilobelaki: "Nakokita awa mpe Nakomibomba kino bakosilisa, bongo nakoki kobima." Bongo wana ezalaki ngai kokita, esalamaki ete nábéndama na ... Makanisi na ngai ebandamaki ete natála na loboko na ngai ya mobali. Mpe ntango natalaki, namonaki wana pake moko ya makaya kasi ezalaki mpamba, moko na bango abwakaki yango ntango bazalaki kokima na matiti mpo na kolanda biséndé.

Bongo nalokotaki pake ya likaya yango, mpo na kotala ... Nalokotaki yango ata te; bolimbisa ngai. Natalaki yango na nse. Nalokotaki yango te, mpamba te nalingaka nsolo na yango te, mpo na kobanda. Natalaki wana na nse, mpe —ezalaki na nkombo ya kompani moko boye ya makaya, oyo nabanzi, nasengeli kotanga nkombo na yango te, bokoyeba yango. Ezalaki na maloba oyo likolo na yango : "Kiyungulu ya moto ya mayele mpe mposa ya momeli likaya."

Natalaki yango, mpe nakanisaki: "Kiyungulu ya moto ya mayele?" Namilobelaki: "Soki moto yango akokaki kokanisa, akomela likaya ata moke te. Ndenge nini ekoki kozala 'kiyungulu ya moto oyo azali na mayele'? Moto oyo azali na mayele akomela likaya ata moke te. " Malamu.

19 Sikawa, namilobelaki: "boni ezali mpenza kopengwisa!" Sikawa, bakompanyi ya makaya yango ezali ya Amerika. Mpe ô, soki tozalaki kobika engebene mobeko na biso, tolingaki kosala mosala mpo na kosungana bamoko na bamosusu, soki tozalaki na bolingo bamoko mpo na basusu. Mpe oyo nde bokosi mpenza! Ntina oyo natangi nkombo ya kompani yango te, ezali mpo nakoloba makambo ya mabe na ntina na yango. Mpe boni moto akoki kozala na bokosi, bobele mpo na kozwa mbongo!

Moto ya mayele, oyo akanisaka, akoki komela likaya ata moke te. Kasi boni bato ya Amerika bazali kokweya mpo na yango; bazali kokanisa ete ezali kitoko mingi!

Sikawa botala, okoki te, okoki te ... Bokoki kotuna moto nyonso, bato ya zebi, soko bolingi ... Okoki te kozala na milinga bongo ozanga gudro. Soki ata molinga moke eleki, ezali gudro. Bongo soki ozali na milinga ezali te, ee, okozwa mpe gudro ata moke te, okozwa eloko moko te. Wana ozali bobele kobenda lingenda moko ya makasi. Kasi na ntango nyonso oyo ozali kobenda milinga, ozali kobenda kanser, nicotine.

20 Soki bozalaki elongo na ngai na mobu moleki, to na mobu oyo molekaki liboso na oyo ya suka, nabanzi ezalaki yango, na Bolakisi ya Biloko ya Koteka ya mokili mobimba, ntango Yul Brynner mpe bamosusu nyonso bazalaki kuna mpo na kotalisa makambo, bolingaki komona bango kokamata likaya, kotya yango na kati ya eloko moko mpe kopakola yango na mwa libanga. Bongo monganga moko azalaki kokamata mwa nzete moke, kolekisa yango na libanga wana mpe kozwa nicotine mpe kotya yango likolo ya mokongo ya mpoko moko ya mpembe, na nsima atyaki ye na kati ya mwa ndako. Mpe nsima na mikolo nsambo nyonso bazalaki kobimisa ye. Bongo mpoko yango etondaki na kanser na lolenge ete ekokaki kotambola te, kanser yango eutaki na nicotine ya likaya moko mpamba.

Na sima alobaki boye: "Boyebi, bango balobaka ete bokoki kolekisa yango na kiyungulu." Alobaki: "Okoki kozala na kiyungulu te ... Kiyungulu nyonso oyo ekoki kolongola nicotine, ekolongola mpe molinga; "alobaki," mpamba te osengeli kozala na molinga ... osengeli kozala na gudro mpo molinga ebima, mpe ezali gudro nde epesaka kanser. "

Nsima akendeki mpe alekisaki yango na mai, mpe alobaki: "Ntango mosusu okanisaka ete okoki kolekisa yango na eloko moko." Alobaki: "Na mbala nyonso oyo ... ata soki obendi yango na nzela ya eloko nini." Alobaki: "Bango balobaka: 'Namelaka yango te,' kasi bakotisaka yango na monoko na bango mpe na nsima babwaki yango libanda." Bongo akamataki yango, alingaki yango, mpe atiaki yango na nse ya eloko moko, mpe atalisaki ete ezalaki kaka kanser. Ozali kosala nini? Komeláká yango na mongongo na yo. Bomoni? Mpe ata osali nini, ezali bobele kufa. Bomoni?

21 Mpe kokanisa ete kompani moko ekolinga kopengwisa moto moko na ndenge ekoki, to komeka kopengwisa bato na bango moko. Ezali lokola engondó oyo azali kolia baoyo ya lolenge na ye moko. Kosala mosolo na kotekáká kufa na—na ekólo, mpe na bilenge mibali. Bongo bazali kokende kuna na etumba mpe kokufa mpo na bango, na nsima bazali kobaluka mpe koteka eloko ya boye na nzela ya lokuta, "Kiyungulu ya moto ya mayele, mposa ya momeli likaya." Osengeli kozala na milinga mpo oyoka elengi na yango. "Mposa ya momeli likaya."

Ata bongo bato bazali kokweya kati na yango! Bazali kozwa yango. Sikawa, ezali bobele mpo na

kopengwisa bino koleka. Bomoni, ezali ya zabolo. Bomo na bino ezali na ntina ata moko te mpo na bango. Bazali na mayoki ata te mpo na bino. Bazali kotekela bino biloko wana bobele mpo ete bokufa, na ntango nyonso oyo bango bakoki kozwa misolo.

22 Ezali lokola mopelengano mpe bitumba. Nandimaka bitumba te. Nandimaka ete tosengeli kozala na bitumba ata moke te.

Nandimi ete na Bokonzi monene oyo Nzambe azali kobongisa, bompenzá monene oyo ekozala na nse ya boyangeli monene ya Ye moko; etumba mosusu ekozala soko moke te. Ekolo moko ekokamata bibundeli mpo na kobundisa bikolo mosusu te. Bango nyonso bakozala na kimia, kimia ya Seko.

Boye, bompenzá ya lolenge oyo ememaka etumba. Mpe na nse ya bompenzá oyo, koleka tozali kobonga mpe kokoma na boyebi, koleka tozali na bitumba. Moto oyo azali komeka koleka moto mosusu wana, mpe koleka mokili oyo ezali kobonga, bitumba mpe ezali kokoma mingi. Bomoni?

Mpe bótala eloko moto akoki kosala na bompenzá ya mokili oyo, ete moto akoki kobimisa eloko ya motindo wana. Mpe eloko bobele moko oyo yango ezali kolanda, ezali bobele ya kokósa bino mpo bosomba makaya mingi koleka. Mpo soki moto azali komela makaya ... Mpe ngai nandimi ete ezali ya zabolo, ezali molimo ya nicotine na kati ya mobali to mwasi moko. Bongo soki likaya moko ezali kosepelisa molimo wana ya nicotine mpo ete atika yo kimia mpe atika kotungisa yo na likaya bobele moko. Boye yo okozwa kiyungulu moko, yango ekolekisa bobele ndambo ya milinga to moko likolo na misato ya nicotine wana kati na yango, wana ekosenga makaya misato na esika ya moko, na bongo yo okomela makaya misato na esika ya moko.

Bomoni, ezali bobele—mayele mabe, lipengwa, mayele mabe mpo na komeka koteka makaya. Na kosala bongo bakoki koteka makaya mingi koleka na esika ya bobele kotika moto ámela tumbako na pipe na ye to na likaya na ye. Sikawa, bomoni, yango ezali ya zabolo.

23 Etelemaki ngai wana kotaláká yango, mpe kokanisáká boni ezalaki na mayele mabe, motuna eyelaki ngai. Boye nagunzamaki mpe natalaki lisusu pake ya makaya yango, mpe na ... emonanaki lokola eloko moko elobelaki ngai: “Kasi maloba yango ezali na yango malamú, “kiyungulu ya moto ya mayele, mposa ya momeli makaya. ” Nakomaki na kokanisa ete lipengwa oyo ezali na mokili na oyo etali tumbako, ndakisa, ezali mpe na mangomba ya lelo, bomoni, lipengwa.

Ekomi kino mokili mobimba ekómi lipengwa moko monene ya makambo oyo ezali mpenza solo mpe ya makambo oyo elongobani. Bomoni, ata kati na politiki, kati na mambi ma bato, na kelasi, na makambo nyonso; ekómi lipengwa.

24 Elenge mobali moko azalaki koyebisa ngai mokolo mosusu ete azalaki na moláko ya basodá, mpe elenge sodá moko aniatamaki na motuka monene ya basodá, mimpululu na ye, líkundú na ye, to soko ezalaki nini, etobokaki. Bongo bakendeki na lopitalo; bazalaki na minganga misato to minei oyo bazalaki wana na molongo, mpe bato nyonso bazalaki na molongo. Bongo basodá mibale to misato bamemaki moninga na bango, mpe ye azalaki mpenza kopema na mpasi ... Ntango nyonso azalaki kopema, mokuwa ya mopanzi ezalaki kokota kati na mipúlúlú na ye, mpe yango ezalaki kosbimisa makila na kati ya nzoto na ye. Mpe bango batikaki elenge mobali yango atélema wana na molongo, mosika mpenza na nsima ya molongo, mpe batikaki bango, basusu kati na bango bazali bobele na mpasi na matoyi to eloko moko ya bongo, bakende liboso.

Bongo bobele ntango akomaki kuna, mokonzi moko ya basodá ayaki na mwana moko ya moke, oyo abimaki mwa makwanza, mwana na ye ya mobali to ya mwasi abimaki mwa makwanza na loboko na ye. Boye batelemisaki molongo yango mpo bakotisa mwana ya kolonele wana, na ntango oyo elenge mobali wana oyo azokaki, azalaki kobunda na liwa. Yango wana.

Ô, soki kolonele wana ázalaka na mayoki malamú mpo na ndeko na ye ya mobali kuna na molongo, mbele alobaki: “Mwana oyo akoki kozela. Bokotisa mobali oyo awa na lombangu, bosala eloko moko mpo na ye! ”

25 Kasi moto nyonso alingi kolakisa bokonzi na ye. Nzokande, bango nyonso bazali ndenge wana te; te, bango nyonso bazali ndenge wana te. Kasi bato mingi bazali lolenge wana. Bato mingi kati na bango bazali ndenge wana. Kasi mobali yango, eloko bobele moko oyo azalaki kokanisa, ezalaki mwana na ye moko oyo azalaki na mwa makwanza na loboko, azalaki kokanisa te na ntina ya elenge mobali wana ya mawa oyo atelemaki wana, anyatamaki na nse ya motuka ya bitumba ya basodá, ntango mosusu motuka moko wana to mpe elenge mobali moko wana oyo akokaki kobikisa bomoi na ye mokolo moko na etumba. Bomoni, batelemaka ata te mpo na kokanisa; kasi bobele mpo na bango moko.

“Kiyungulu ya moto ya mayele.”

Natalaki yango, mpe namilobelaki: “Ezali leloko moko lokola —lokola bibongiseli ya lelo, mangomba oyo tozali na yango.” Moko na moko ezali na kiyungulu na yango moko; bazali na kiyungulu yalolenge na

bango moko. Balekisaka bobele oyo bango balingi ete ekota, mpe bayebi oyo ekokota te; oyo bazali kolekisa na kiyungulu mpo ekota na kati to mpo na ebima libanda, nyonso wana na kiyungulu oyo ya bango moko. Bazali kotika mwa ndambo na makambo ya mokili ekota mpo na kosepelisa bazangi kondima oyo bazali kuna. Bazali kokotisa bango ata soki bazali ndenge nini, bobele ete bázála na misolo. Bakokotisa bango ata soki bazali ndenge nini, bobele ete bázála bato oyo bayebani.

Kasi solo ezali ete, okoki kokota na Lingomba na Nzambe ndenge wana te; ebongiseli te sikawa, nalingi koloba Lingomba ya solosolo, Lingomba ya Nzambe oyo ya solosolo.

26 Lokola ba kompani ya makaya ya lelo, bato oyo bazali kokota na oyo ebengami mangomba to bibongiseli, bazali na mposa moko boye, mpe mposa yango ezali ya makambo ya mokili. Mpe ebongiseli moko na moko ezali na kiyungulu na yango moko, mpe bazali koyungola libanda Baklisto nyonso ya solo oyo balobaka “amen” ntango azalaki koteya; mpe bazali kokotisa ba-Yezabele nyonso oyo bakáta nsuki mpe bapakóla langi na bilongi oyo bazali kati na mboka, na ntango nyonso oyo bayebáná. “*Moto songolo to pakala* ayaka na ... mosani moko ya bafilime, moto monene.” Bango basalelaka nde kiyungulu ya motindo wana. “Ebongiseli na biso. *Moto songolo na pakala*, Mokonzi ya mboka, to ba—to kolonele, to moto boye ayáka na ebongiseli na biso. ” Bomoni lolenge ya kiyungulu bazali kosalela? Kiyungulu yango na ntembe te, ezali ya mokili, bato ya mokili.

Bato, bayebi eloko balingi. Boye soki basengeli kozua eloko balingi, ekosengela na bango kozala na lolenge moko boye ya kiyungulu, mpo elekisa mwa ndambo ya mokili mpo na kosepelisa mposa na bango ya mokili. \*Kiyungulu ya moto ya mayele, mposa ya momeli likaya.” Kiyungulu ya moto na mangomba, mpe mposa ya moto ya mokili.

27 Bazali na mposa ya kozala basambeli. Bakanisi ete basengelaki kozala basambeli, mpo bazali na bomoto na kati.

Ntango yambo tokómaki na mboka oyo, tokutaki ba-Indien kosambeláká moi mpe bongo na bongo, mpo ete (mpo na nini?) azali moto. Soki tokoti mpenza kuna na kati ya zamba ya Afrika, tokomona bakolo mboka kosambeláká eloko moko. Mpo na nini? Bazali bato, mpe balingi, basengeli kosambela.

Na bongo, moto nyonso, ata soki akweyi ndenge nini, ayebi ete eloko moko ezali esika moko. Kasi azali mpenza na mposa moko ya mokili, na lolenge ete akoki te kokamata kiyungulu ya malamumu. Asengeli kozala na kiyungulu oyo ye moko asali. Moto nyonso azali kosala kiyungulu na ye moko.

Kompani moko na moko ya makaya ezali kobeta ntolo na oyo ya bango, na oyo bakoki kosala, “Kiyungulu ya solosolo! Oyo nde eleki malamumu! Nyonso ezali na songé! ”mpe makambo lolenge wana.. Bazali koloba: “Elengi to mposa,” to eloko moko boye, “ezali kouta na songé.” Ô, mawa! “Na songé”? Bongo eloko nini kasi ezali na suka na yango? Wana ezali mpenza te mobali to mwasi oyo azali na mayele. Kasi ezali bongo nde bazali koloba, kokosáká bobele bato.

28 Sikawa, tomoni lelo ete bato bazali na mposa moko. Bongo mpo na nini moto amelaka likaya? Ezali mpo na kosepelisa mposa moko boye. Mpo na nini mwasi azali komela likaya? Mpo na kosepelisa mposa moko.

Na bongo, soki losambo ezali kotalela etonga moko ya basambeli, bango ... mpo ete yango ekotisa bato kuna, ekosengela na bango ete bázála na lolenge moko ya kiyungulu mpo na kopesa na bato eloko oyo ekosepelisa bango. Boye soki bato bayoki elengi oyo balingi te, bakoboya likaya yango. Mpe soki bakoki te kosepelisa mposa oyo balingi na makambo na kosambela, bakondima mpe makambo ya kosambela te. Sikawa, ezali mpenza komonana polele.

Basi na bakupé, bakatá suki, bapakoli langi na bilongi, balati bilamba oyo bizali kotalisa nzoto, balingi kozala bongo. Balingaka yango.

Ndenge nalobaki na ntongo ya lelo mpe na mokolo ya lomingo loleki na ntongo, likolo na yenda na katikati ya yenda, to bomoto ya kati wana ya moke, na kati ya molimo. Kotalisáká ndenge molimo, na libanda katikati na bomoto ya kati mpe nzoto, ekoki kopakolama mpenza na Molimo Mosantu. Bino banso bososoli yango? [Losambo elobi: “Amen.” — N.D.E.]

29 Sikawa, mpo na kolandisa yango mpo eyokana na Nsango, *Nzambe Ya Mokili Oyo, Bapakolami Na Ntango Ya Suka*. Oyo ya libanda, zolongano wana ya katikati ... Zolongano ya liboso ezali—ezali biyokeli ya moto. Zolongano ya mibale ezali biyokeli ya molimo; bolingi, bolingi ya moto yemei, mposa, mpe bongo na bongo. Kasi kuna na kati ezali na bomoto ya kati; bomoto ya kati yango ekanamaki liboso.

Na bongo, bakoki kopakola molimo mpo na komema nzoto ya libanda na botosi ya molimo. “Kasi bomoto ya kati oyo esali lisumu, bomoto ya kati yango ekokufa.” Bomoto na kati oyo ekoboyi na kozanga kondima, Liloba na Nzambe, oyo ezali eteni na yango, bomoto na kati yango, mpo na Seko ... ezali, ntango nyonso.

Nandimaka na kufa moko ya Seko, ndenge moko lokola nandimaka na Lola ya Seko, kasi na lifelo ya Seko te. Eloko lokola lifelo ya Seko ezalaka te. Kufa ya Seko ezali mpo na bato oyo bazali ... Mingi kati na bango, basambeli, na mokili lelo, bazalaka ntango nyonso ya kokufa.

“Mwasi oyo azali kobika na bisengo,” ná suki na ye ya kokata mpe ná langi na elongi; “Asila kokufa wana azali na bomoi.” Biblia elobi bongo. Bomoni? Bomoni, akoki na ye kozala mosambeli, kasi abikisámá ata moke te. Azali na komonana ya libanda. Akoki koyemba na korále, to akoki kobina kati na Molimo, akoki koloba minoko na sika, mpe kozala na komonisama ya misala nyonso ya Molimo. Kasi bobele soki bomoto ya kati kuna na kati ezali mwana mwasi na Nzambe, abungi na ye, ata soki asali nini.

30 Yisalaele, nakomonana libanda bazalaki bato ya molimo, batondisamaki mobimba na bolamu ya Nzambe, mpe bazalaki komemya Nzambe mpe bongo na bongo, kasi yango esalaki eloko te. kati na bango ekokaki te koyeba Liloba Yango Moko.

Kasi ntango obotami na Molimo ya Nzambe, na ntango wana ozali na ... ozali mwana mobali na Nzambe, mpe ozalaka ntango nyonso mwana mobali na Nzambe, mpe okozala ntango nyonso mwana mobali na Nzambe. Nzela ya kokabola yango ezali te, mpo ezali ... ozali na Bomoi na Seko. Mpe Oyo ya Seko ezalá na ebandeli te; mpe ekozala na suka ata moke te.

31 Ô, ngolu na Nzambe, ete Apesi biso lisosoli ya mabombami minene boye! Ndenge Polo alobaki awa, na Baefese, kolobáká na ntina na mobali mpe mwasi na ye, alobaki: “Oyo ezali libombami,” ndenge basi basengeli kozala na botosi epai na mibali na bango. Nabanzi ezali esika ya mibale na Biblia mobimba wapi elobami na ntina ya limemya. Ezali koloba ete “Basi basengeli komemya mibali na bango, komemya mibali na bango.” Bongo mobali asengelaki kobika bomoi ya ndenge moko liboso na mwasi na ye na lolenge ete mwasi amemya ye lokola mwana na Nzambe. Boye soki azali kobika bomoi ya lolenge wana te, ee, na bongo, na ntembe te, mwasi akomemya ye te, mpo ayebi oyo mobali yango azali. Kasi soki mobali yango azali moto ya limemia, ya limemia mpe ya peto liboso na mwasi na ye mpe liboso na libota na ye, mosali ya Nzambe mpenza, na ntango wana mwasi, bana, mpe bato nyonso, basengeli komemya moombo oyo ya Nzambe, na bobangi.

32 Botala sikawa. Basi; balingaka kozala na suki bakátá. Balingi kolata bakupé, kopakola langi, kosala monzele. Mwa babikini mikie mikie mpe biloko mosusu oyo bazali—oyo bazalaki kolata mikolo oyo, balingi kosala bongo; nzokande balingi kokende losambo. Boye bokoki komona kopakolama likolo na molimo, kasi likolo na bomoto ya kati te. Bomoni?

Balingi kozala Baklisto mpe na ntango moko wana kosala makambo wana, mpe mokengeli azali koloba ete ezali malamumu. Boye soki alobi ete ezali malamumu: “Okoki kozala mondimi na biso, nkombo na yo ekoki kozala na buku ya losambo na ngai awa, ezali malamumu,” wana azali kopesa na mwasi yango kiyungulu ya ebongiseli mpo esepelisa mposa na ye ya mokili. Mwasi yango alingaka mokili; azali na mposa na yango. Na bongo, azali na kiyungulu mpo na mwasi yango, kasi azali mosika na kozala mwasi oyo ya mayele. Kasi ezali mpenza yango. Wana nde esika namonaki liteya oyo.

Te, azali mo—mwasi ya mayele te. Soki akanisaka, alingaki koyeba ete ezali lingomba te nde ekosambisa ye na Mokolo ya suka. Lingomba ezali kotala ye na ndenge azali moko na yango, bosembo na ye na moziki oyo ye azali kati na yango mpe na masangana ya bato. Bazali sikawa kosambisa ye na yango. Kasi Nzambe akosambisa ye na Mokolo ya suka. Boye azali na ye kokanisa te.

33 Ezali kaka ndenge moko ná momeli makaya; ye alingi likaya mingi mpenza na lolenge ete makoki na ye ya kokanisa ebulungani na nicotine. Mpe bamposa ya mwasi yango ebulunganisi mpenza makoki na ye ya kokanisa kino ete azali kosala makambo wana ya mbindo na miso na Nkolo, mpo ete azali na mposa ya kosala yango; ezalaki kosepelisa mposa ya mwasi ya mokili. Na boye ye azali kozwa kiyungulu ya lingomba ya mokili; azali koleka kati na yango na petè, malamumu, eloko moko te ya kmitungisa. Etalisi ...

Sikawa tomoni wana ete yango ezali Solo. Mpe mokengeli alobi: “Ezali malamumu. Tókweisaka basi mpo na kosala bongo te. Ezali na yango malamumu.” Lisumu ezali kati na yango, ezali na nzela ya kiyungulu na ye. Etalisi ete balekaki na nzela ya kiyungulu ya teoloji. Mpe bazali na bamposa moko ya teoloji; mpe bazalaki na bamposa ya teoloji moko. Kasi na ntembe te yango elekaki na nzela ya kiyungulu ya Nzambe te. Te, misie.

34 Bongo soki kiyungulu moko ya teoloji ezali mpo na moto oyo azali na mayele ya teoloji, mpe kiyungulu ya lingomba ezali mpo na moto moko oyo azali na mayele to makanisi ya lingomba, kiyungulu ya likáya mpo na makanisi ya momeli likaya, esengeli kozala na kiyungulu ya solosolo esika moko mpo na makanisi to moto ya mayele ya solosolo. Boye Nzambe azali na kiyungulu, mpe yango ezali Liloba na Ye. Yango ezali kokabola, mpamba te Ezali mai ya bokabwani mpo na lisumu. Sikawa, oyo nde moto oyo akanisaka to mposa ya moto oyo azali bulee.

Boye soki moto aleki na nzela ya kiyungulu ya boye, ya mokili, a—akozala na elengi to mposa ya mokili. Mpe lokola kompani ya makaya, ye akózwa bandimi mingi na lingomba na ye, na kolekisáká bango



na nzela ya kiyungulu yango. Bino bokoloba: "Basi bakendaka mingi na losambo koleka mibali." Ekoki kozala bongo. Sikawa, ekoki na yango mpenza kozala solo, ntango akoki na ye kokende mpe kosala makambo nyonso oyo ye alingi. Ya solo. Akosala yango, akoki kosangana na eloko nyonso, kasi alekaki na nzela ya kiyungulu ya lingomba wana. Soki alekaki na nzela ya kiyungulu ya Nzambe, alingaki kobima abongwani. Bomoni? Akokaki te koleka na nzela ya kiyungulu ya Nzambe bongo ábima ná suki ya kokata. Akoki mpenza kosala yango te.

35 Sikawa oyo ekozala na—na mwa bololo ntango mosusu mpo na moto moko. Kasi na ntango ye akoti na kiyungulu ya Nzambe, mpe Elobami kuna na ntina na bango ete bakata suki na bango te, na ntango wana (akosala nini?) akokende na ye epai mosusu. Soki Elobami ete ezali lisumu mpo na mwasi kosala bongo, ete ezali nsoni mpo na mwasi kosala bongo.

"Soki ata bongo ye alingi kosala yango," alobi ; "ee, asengeli kozala na suki ya kokata."

Elobami, na bongoi, "Akókola motó mobimba." Mpe alobaki: "Toyebi ete ezali nsoni mpo na mwasi kozala na motó kolokolo." Alobaki: "Na bongo tika ete azipa motó na ye." Mpe suki na ye nde ezipeli na ye; ekoti te, mama. Biblia elobi ete suki na ye nde ezipeli na ye. Ya solo. Ezali kotalisa ete azali Monazili mpo na Nkolo. Suki milayi mpo na mwasi, elingi koloba Monazili mpo na Nkolo. Bongo, tomoni ete ezali ya solo.

Kasi tomoni ete soki mpo na mokili moto oyo azali na makanisi, to moto ya mayele akoki na ye komela makaya mpe na bongo kosepelisa mposa na ye, asengelaki kozala na makanisi ya malamumu ya kokoka mpo na koyeba ete azali kozwa gudro uta na tumbako. Kasi yango ezali bobele, oyo ezali kosalama ezali ete batekela ye mingi, basombisa ye makaya mingi koleka.

36 Mpe kiyungulu ya lingomba ezali kozwa bandimi mpe makambo ya ndenge wana, ntango bazali kotika bango bákota ata na biloko ya ndenge nini, kasi bázala kaka bandimi ya lingomba, na bongo bazali kozwa bandimi mingi koleka. Nini elingaki kosalema soki tokendeki na mangomba na mpokwa oyo mpe tolekisi na kiyungulu bato nyonso, libanda na Baklisto ya solosolo oyo babotami na nzela ya Liloba? Bato bakotikala mingi te na mpokwa oyo, ezali solo, mpamba te ekolekiswa na Kiyungulu.

Boye soki nazali na mposa moko na motema na ngai, mpe nazali kolikia ete moto nyonso oyo azali koyoka ngai azali na likambo moko wana: "Nzambe, lekisa ngai na kiyungulu na Yo." Ndenge Dawidi alobaki: "Meka ngai, mpe luka kati na ngai, mpe tala soki mabe ezali kati na ngai, na bongo longola yango, Nkolo." Bomoni? Nalingi kiyungulu ya Nzambe. Ata soki mokili esálaka nini, ata soki lingomba ezali na nini; nalingi kozala moto ya mayele, mpo na koyeba soki na kotelema pembeni na Nani moko na mikolo oyo, mpo na Kosambisama.

37 Botala, kompani ya tumbako esálaka yango mpo na koteka makaya mingi koleka; lingomba esálaka yango mpo na kozwa bandimi mingi koleka. Mwasi oyo azali na suki mikuse, alati bakupe, akokangama na kiyungulu ya Nzambe. Akoki koleka na nzela na Yango te ná suki mikuse, mpamba te Biblia elobi ete asengeli kosala yango te. Ye mwasi azali koyeisa nsoni na motó na ye ntango azali kosala yango. Tosengelaki koyeba yango. Kasi azali koleka na oyo ya lingomba na pete, ná bamosusu nyonso. Ntango mosusu nazalaka ...

Ezali mpo na kozanga limemya na moto te; ngai nalobaka soko moke te na ntina na moto moko boye, kasi ezali lisumu kati na lingomba. Bozali batatoli na ngai na ntina na yango. Nalobaki te: "Elenge mwasi Songolo azali boye to boye, to Misie Songolo, to Mokambi pakala azali boye to boye." Te, misie. Ngai nalobi ete lisumu ezali lisumu. Soki ezali kati na libota na ngai, kati na ngai, kati na moto soko nani, ezali kaka lisumu. Lokola moto te, ngai nalobelaka kotelemela bato te. Nalobaka kotelemela lisumu. Ezali na ntina te soki ezali ngai to moto soko nani, soki oleki na kiyungulu ya Nzambe, lisumu nyonso ekokanga yo bobele wana.

38 Botala. Kasi mwasi oyo alingi kozala na suki mikuse mpe kolata bakupé, to kopakola langi na elongi mpe biloko mosusu, akoki koleka mbala moko na kiyungulu ya ba-Pantekotiste na mapsi te lokola mikate, likambo ezali te, ezali komema mbala moko na liwa. Mpamba te, ye ... AYe akoloba: "Ee, mabe ezali te na yango."

"Soki bolingi mokili, to biloko ya mokili, ezali mpo ete bolingo na Nzambe ezali ata na kati na bino te."

Boye, na nzela ya molimo yango, akoki kokotisa na kati ya bomoto na kati na ye biloko oyo ezali ya Nzambe te, mpe oyo ezali kotelemela Liloba na Nzambe, soki yango nde mposa ya bomoto ya kati. Ekoki koya na nzela na komeka elengi; *komona, komeka elengi...* Ekoki koya na nzela na *makanisi*, na *kobanzabanza*, "mabe ezali kati na yango te. Nazali na makoki ya koyoka elengi. Nazali na mayoki. Nazali koyoka ete likambo oyo ezali na yango malamumu." Ekoki koleka na nzela na yango mpe kokota mbala moko kati na bomoto na ye ya kati, soki bomoto na ye ya kati ezali ya lolenge wana. Yango etalisi ete azali kobendama na nzela na kiyungulu ya Nzambe te.

Kasi soki mwasi yango azali na suki ya kokata, na bipakola-pakola, bakupe, bapataló, azali komonana

lokola mobali, mpe bilamba ya motindo wana to soki babengaka yango nini: azali koloba mpe kosala makambo ya motindo wana, kobikáká mpo na mokili, akotelemisama, akoki koleka na nzela na yango te. Te, misie. Yango ekotelemisa ye mbala moko.

39 Botala, mobali oyo azali kotala bibebu wana ya kitoko mpe ya motane, elongi wana epakoli langi, mpe bakupé, na —na bakaleso, to eloko soko nini mwasi yango azali na yango; moto ya solosolo oyo akanisaka, oyo ya mayele akotala ye te. Sikawa, mobali oyo azali mondimi ya lingomba akotala ye, akosepela na ye. Kasi etali ngai te ndenge liso ezali komona ye, moto ya mayele to oyo akanisaka akobalola motó na ye. Mpo na nini? Ye asila koleka na kiyungulu ya Nzambe, boye ayebi ete kotala mwasi yango ezali kosala ekobo na motema na ye. Mpo na ye mwasi yango azali kitoko te.

Moto moko akoloba: "Oyo nde mwasi kitoko!"

Ezali bongo te mpo na ye. Azali mbindo, Yezabele mabe mpe ya mawa, mpo na moto oyo akanisaka. Mwana mobali na Nzambe akotala ye na nsoni ya kozala ata na libota moko na ye. Ya solo. "Ndenge nini akoki kozala ndeko na ngai ya mwasi bongo ásála makambo ya boye?"

Bomoni, mwasi yango aleki na nzela ya kiyungulu moko, mpe ye aleki na nzela ya kiyungulu mosusu. Akokanisa te ete mwasi yango azali kitoko te, ata moke te. Wana ezali kitoko te mpo na moto ya solosolo ya Nzambe.

40 Bokanisa naino, mokolo moko liboso ete Makila na Yesu Klisto ekóma kiyungulu, lokola tokomona yango na mwa ntango moke: "Bana mibali na Nzambe batálákí bana basi na bato, mpe bamonaki ete bazalaki bonzenga, bongo bakamataki bango lokola basi na bango." Nzambe alimbisaki yango ata moke te. Yango esalemaki lisusu na kotambola ya Yisalaele, mpe Nzambe alimbisaki bango ata moke te. Bango nyonso bakufaki.

Kiyungulu ya moto ya mayele!

Nabimaki na liyangani awa na mpokwa moko; eleki pene na mibu misato to minei, mwa "ricky" moko atelemaki kuna na nsima ya ndako ya losambo, alobaki na ngai: "Ntina olobi bongo ezali mpo ozali mobange." Alobaki: "Ngai nakanisi ete bazali kitoko."

Nalobaki: "Nakamwe na ngai te." Bobele na kotala lolenge na ye, okoki koyeba oyo ye azalaki. Nalobaki: "Tika nayebisa yo eloko moko. Yo ozali na mibu boni? "

"Pene na mibu ntuku misato."

Nalobaki: "Ntango nazalaki na mibu zomi na mitano na nse ya oyo ozali na yango, nazalaki kokanisa lolenge moko." Ya solo. Mpe yango ezali kaka mbindo!

41 Kiyungulu ya moto ya mayele! Sikawa botala, soki ye, makanisi na ye élekaka na nzela na kiyungulu ya Liloba na Nzambe, kiyungulu ya Nzambe, alingaki kotala ye te. Alingaki kokanisa te ete mwasi yango azali kitoko; alingaki kokanisa ete azali Yezabele. Akomilobela ete na sima ya mbebo motane wana, ezali na mino na mbondo oyo ekoswâ ye. Mpe Biblia elobi: "Bikuke na ye ezali bikuke ya lifelo; mpe moto moko azali kokota kuna lokola ngombe akei na kobomama." Wana nde Kiyungulu ya moto ya mayele.

Ozali na mposa ya nini? Ntango mwasi azali koya na balabala alati motindo wana, mpe yo mobali obaloli motó na yo mpo na kotala ye, wana ozali kosalela Kiyungulu ya moto ya mayele te. Mpamba te ntango ozali kosala bongo, ozali kosala ekobo, mpo Kiyungulu elobi: "Moto nyonso oyo akotala mwasi na mposa mabe, asili kosala na ye ekobo." Balola motó na yo, moto ya mayele!. Kende mosika na ye. Azali kitoko te. Azali nyoka, ya solo, azali komibalusa balusa lokola ye, azali kosala makambo mpe koswâ lokola ye. Zalá mosika na ye.

42 Ô, iyo, Liloba na Nzambe ezali Kiyungulu ya moto oyo akanisaka. Moto nyonso ayebi yango. Yango nde ezali koyungola Bomoto na yo ya kati, Liloba na Nzambe. Mpe Ekómisi, ntango okobima na nzela na Nzambe ... Soki moto ya makanisi ayei na nzela ya Kiyungulu na Nzambe, yango ekopesa ye mposa ya moto ya bulee. Ya solo. Ntango oyei na nzela ya Kiyungulu ya Nzambe, wana mposa na yo ezali ya moto mosantu. Ekósala bamposa ya moto oyo azali moyengebeni. Maloba wana ezali mpenza na molongo.

Sikawa tomoni ndenge yango esalemaki na Yisalaele lokola elilingi, bobele mpo na eyánganelo ya Yisalaele. Yango nde ntina nazali koloba boye sikawa, soki batei baboyi kondima eloko moko oyo elobami; oyo ezali mpo na losambo na ngai oyo Nkolo apési ngai mpo na—mpo na koteya.

43 Botala na Esode 19, nalingi ete botanga yango ntango bokozonga na ndako, ntango bokozala na ntango mingi. Botala, ntango Yisalaele asalaki lisumu, yambo bazalaki kokamata ngombe ya motane oyo atikala kozala na ekanganeli na nkingo na ye te. Elingi koloba ete atikala kotyama na ekanganelo na eloko moko te.

Mpe asengelaki kozala motane. Langi ya motane ezali lan—langi ya mboni. Boyebi, bato ya zebi

bayebi ete soki okamati motane mpe otali motane na nzela ya motane, ezali mpembe. Kótala motane na nzela ya motane, ezali mpembe. Nzambe atali na nzela ya Makila motane ya Nkolo Yesu, boye masumu na biso ya motane ekomi mpembe lokola matandalá; motane na nzela ya motane.

Bongo ngombe ya motane azalaki kobomama na ntango na mpokwa na ya eyánganelo mobimba ya Yisalaele.

Mpe bazalaki kotya minkolótó nsambo ya makila na ye na ekuke esika wapi eyánganelo mobimba esengelaki kokóta; elilingi ya Bileko Nsambo ya Lingomba, na nzela ya Makila.

44 Na sima nzoto na ye ezalaki kokamatama mpe kotumbama. Ezalaki kotumbama elongo ná makolo, ná mposi, ná misopo, ná salité na yango. Biloko nyonso bizalaki kotumbama elongo.

Mpe esengelaki kolokotama na moto moko ya péto, mpe esengelaki kotiyama na esika moko ya péto libanda na eyánganelo. Yango wana, soki Yisalaele bakokaki bobele komona elilingi! Liloba na Nzambe oyo esengeli te kosimbama na maboko ya mbindo ya bozangi kondima. Esengeli kozala moto moko ya péto. Bongo soki azali péto, asengelaki koleka na nzela ya Kiyungulu na Nzambe.

Moto ya péto, maboko ya péto, mpe esengelaki kobatelama na esika moko ya péto; ezali te na esika oyo ba-Yezabele, ná "ba-Rickies", mpe nyonso wana; bazali kolia elambo mpe makambo mosusu, na ntango wana bazali kotambola na basi, mpe mibali, mpe lolenge nyonso ya mbindo; kokendáká na mabina mpe bafeti, na basuki bakátá, balati bakupé ná biloko mosusu nyonso, mpe komibenga Baklisto. Esengeli kobatelama na esika ya péto, mpe koyángelama na maboko ya péto.

Na nsima, ntango Yisalaele asalaki lisumu, mpe bayebaki ete basalaki mabe, na bongo bazalaki komwangisama na mputulu ya ngombe yango, likolo na bango. Mpe wana ezalaki mai ya bokabwani, bopétolami na lisumu.

45 Botala. Yango oyo! Bongo ntango Yisalaele, yambo na bango kokota na boyokani na nzela ya masanjoli, basengelaki liboso koleka na mai ya kokabola. "Kolongisama na nzela ya kondima; eyei na koyoka, koyoka Liloba."

Na sima bakotaki na eyánganelo na nse ya minkolótó nsambo wana, makila, mpo na kotalisa ete eloko moko ekufaki mpe ekendeki liboso na bango, mpo na masumu na bango. Bazalaki kokabwana na nzela ya boyoki Liloba, mai ya bokabwani, na bongo bakotaki na boyokani.

Esika bobele moko oyo Nzambe azalaki kokutana ná moto ezalaki na kolanda molongo wana. Akokaki kokutana na ye esika mosusu te. Asengelaki koya na kolanda molongo wana. Nzambe akutanaki na Yisalaele bobele na esika moko.

Mpe Nzambe akokútana na bino lelo bobele na esika moko, mpe yango ezali kati na Yesu Klisto; mpe Ye Azali Liloba, mai ya bokabwani. Mpe Makila na Ye esopanaki mpo na Bileko Nsambo nyonso ya Lingomba. Bongo, na nzela ya Molimo Mosantu, biso tozali kokóta na boyokani wana, oyo epesami bobele na Lingomba. Ó, boni Azali monene!

46 Lisusu, sikawa, tolingi kotala na Baefese 5:26, elobi: "Ezali nde kosukolama na mai ya Liloba," mai ya bokabwani. Yango esalaka nini? Na bongo, Kiyungulu ya Nzambe ezali Liloba. Mai ya bokabwani: "Kosukolama na mai ya bokabwani, na nzela ya Liloba," Kiyungulu ya Nzambe.

Na boye okoki kokota kati na Klisto na nzela ya kiyungulu ya lingomba te. Okoki te koya na nzela ya kiyungulu ya ebongiseli, to kiyungulu ya endimeli moko boye. Kiyungulu ezali bobele moko oyo ekoki kokotisa yo na esika ya bulee wana, ezali na "bosukolami na mai na nzela ya Liloba." Liloba na Nzambe nde ezali Kiyungulu ya moto ya mayele.

47 Lingomba ekosambisa yo awa, soki ozali mondimi malamumu, to te. Bakosalela yo matánga ya malamumu, bakokitisa bendele na liwa na yo, bakotinda mitole minene ya bafololo mpe—mpe bakosala makambo nyonso mpo na yo. Kasi ntango ekómi mpo na bomoto na yo ya kati ekútana ná Nzambe, yango esengeli kozala na Bomoi na Seko. Mpe soki ezali Bomoi na Seko, ezali eteni ya Liloba. Mpe lokola liloba na ngai moko ekoki te kowangana ...

Loboko na ngai moko ekoki kowangana loboko na ngai te. Miso na ngai moko ekoki te kowangana loboko na ngai, to lokolo na ngai, to mosapi ya lokolo na ngai, to eteni nyonso ya nzoto na ngai. Bakoki kowangana yango te.

Bongo mpe moto moko te oyo azali eteni ya Liloba na Nzambe, to mwasi moko te, akoki kowangana eteni moko ya Liloba na Nzambe. Boye basi, ntango bokanisi ete bokoki kokata suki bongo boya Liboso na Nzambe, bozali na libunga. Bososoli yango? Bozali kosala libunga; bokoki te na lolenge wana koleka na Kiyungulu ya Nzambe epai wapi ya bosukwami na mai ya Liloba ezali. Na sima nde okokota na bondeko. Okanisi ete okomi wana, kasi okoki te kino ete okoleka na nzela ya Liloba, mpe mwa litono nyonso, Liloba moko na moko nyonso ya Nzambe. "Moto akobika bobele na mapa te kasi na Maloba nyonso." Yango

esengeli koleka na nzela ya kiyungulu wana, koleka na yango. Mpe yango ezali kotalisa mpímbo ya moyengebeni, mpo yango nde ye azali koluka, azali koluka eloko oyo ekopetola ye.

48 Liloba, Liloba na Nzambe ezali Kiyungulu ya moto oyo azali kokanisa, mpe ezali kosala mpímbo ya moyengebeni. Toyebi ete yango ezali solo; ezali kolekisa na kiyungulu mpe kobwaka libanda lisumu nyonso ya bozangi kondima. Kozanga kondima ezali lisusu te ntango oleki na nzela ya Kiyungulu, mpo yango ezali mpímbo ya mondimi ya solo.

Mondimi ya solo alingi kozala sembo, ata ndenge nini. Alingi bobele koloba te ete: "Ee, nazali moto ya etuluku ya lokumu. Nazali moto ya lingomba, lingomba ya monene koleka kati na engumba." Ata soki ezali mwa misio moko ya moke na litumu moko boye, to ndako ya Nzambe ya matiti esika moko boye, moto ya mayele oyo akanisaka ayebi ete asengeli kokutana na Nzambe. Oyo lingomba elobi to oyo moto mosusu alobi ezali na ntina te, ye asengeli koya na ndenge Nzambe alingi. Mpe masengami ya Nzambe ezali Liloba na Nzambe.

"Ee," bango balobaka, "Liloba na Nzambe!"

Solo, bango nyonso bandimaki ete Ezali Liloba na Nzambe, kasi bino bokoki kolekisama na kiyungulu Yango? Ndenge nini okoki kosala mpo ete mwasi oyo akátá suki áleka na nzela wana? Okosala yango ndenge nini? Okosala ndenge nini mpo na kotika moto moko oyo azali kondima Malakisi oyo te aleka Wana? Bomoni?

Ezali mpímbo ya moto ya makanisi te. Te. Moto ya mayele moko akokanisa, moto ya mayele akokanisa mbala mibale liboso na ye kokota na eloko ya ndenge wana.

49 Botala, Liloba oyo ekoki komiboya Yango moko te. Na bongo ezali kosepelisa, to ezali mposa. Ezali mposa ya eloko nini? Eloko nini epesi yo mposa na Yango, mpo na kobanda? Ezali mpo ete kuna kati na bomoto na yo ya kati, ezalaki na momboto oyo eponamaki liboso, oyo ezalaki Bomoi ya Seko, efandaki kuna na kati ntango nyonso, ezalaki kati na yo ntango nyonso wana. "Nyonso oyo Tata apesaki Ngai bakoya epai na Ngai. Moko te kati na bango akobunga."

Mpímbo ya moto ya makanisi, ntango moto ya makanisi ayoki Liloba na Nzambe: "Bampate na Ngai bayokaka mongongo na Ngai, mopaya bakolanda te," mpo kuna na kati Bomoi ezali, mpe Bomoi esanganaka ná Bomoi.

Lisumu esanganaka na lisumu, mpe lisumu ezali mpenza na bilongi mibale na lolenge ete ekanisi ete ebikisamaki ntango oyo ebikisamaki te. Ezali mpenza kati na bozindo ya bilongi mibale.

Bandimi ya mangomba balingi kiyungulu ya ebongiseli mpo bákoka kosepelisa mposa na bango moko, kasi bátalamana kaka lokola "basambeli". Boyokaka bango koloba: "Oh, azali mpenza mosambeli."

50 Nazalaki na Afrika mokolo moko, mpe bazalaki koloba na ntina na oyo, bilenge bazalaki kosolola na ntina na miziki ya rock-and-roll oyo Elvis Presley ná bamisusu bazalaki koyemba, Pat Boone mpe soko nani mosusu, Ricky Nelson mpe bamosusu nyonso wana. Nalobaki: "Bazali etonga ya batomboki."

Elenge mwasi moko alobaki: "Ee, azali mpenza mosambeli."

Nalobaki: "Ndenge moko mpe Yudasi." Nalobaki: "Yudasi azwaki bobele palata ntuku misato; Elvis Presley azwi bamillio ya badolále." Bomoni? "Bango mibale batekaki makoki na bango ya bokulutu." Bomoni? Nalobaki: "Bazali kotali ... bazali kotalisa nyongo ya mabe koleka oyo ekólo ezali na yango." Ezali mpenza na kopengwisa kaka lokola kiyungulu ya likaya, bibongiseli oyo bazali kotika bandimi wana bakota. Basengelaki ata moke te kozala ... Esengelaki ete mobeko ya kopékisa bango koyemba banzembo ya nzambe ézala. Ezali kotelemela ... esengelaki kozala ete babuki mobeko ntango bazali kosala yango.

Kasi makambo nyonso ekómi mpenza liboke monene ya bokosi, mpe wana nde esika bakomi lelo. Kiyungulu ya solo mpo na bomoto ya kati elobi: "Soki olingi mokili to makambo ya mokili, bolingo na Nzambe ezali ata te kati na yo."

51 Bomoni, bokoki te—okoki koloba te ete rock-and-roll ezali ya mokili ... to ezali ya Nzambe. Rock-and-roll ezali ya mokili. Mabina nyonso mpe makambo mabe wana oyo elekisami na kiyungulu ... to makambo wana ya mbido, ezali ya mokili. Nyonso wana ezali ya mokili.

Okoki koloba te ete suki bakata mpo na mwasi ezali ya Nzambe. Biblia elobi ete ezali bongo te, na yango ezali bosoto ya mokili. Boye soki olingi ata eteni moke ya mokili, bolingo na Nzambe ezali kutu te kati na yo. Bomoni?

Ezali nini? Ee, eloko nini ezali kobenda yango? Ezali eloko moko kuna na kati nde ezali kobenda. Bomoto ya kati ezali kobenda makoki na yo na libanda, kolekisa yango na nzela ya molimo kino na bomoto ya kati. Mpe soki bomoto ya kati elingi mokili, ekufi. Ezali na ntina te boni epakolami, wana ezali awa libanda, mpe boni ezali sembo awa libanda; na kati kuna, esili kokufa. "Mpo ete ye oyo alingi mokili to

makambo ya mokili, bolingo na Nzambe ezali ata na kati na ye te," ata azali mosambeli ndenge nini.

Kiyungulu ya solosolo lolenge oyo, eko—ekobwaka libanda makambo nyonso wana mpe akolekisa eloko mosusu te kasi bosolo ya Nzambe, Liloba, kati na bomoto ya kati ya solo.

52 Bazali lokola Esau, malamumu na libanda. Esau azalaki mosambeli na libanda. Bongo likambo ya kosambela, ye amonanaki lokola mosambeli koleka Yakobo. Amonanaki lokola moto malamumu mingi koleka Yakobo, kasi kati na ye nde eloko azalaki. Azalaki mosambeli ya libanda, kasi makanisi na ye elekisamaki na kiyungulu te. Atalaki makoki ya bokulutu na ndenge ya malamumu te. A—akanisaki te ete Nzambe ... ete makoki ya bokulutu ezalaki na motuya bobele ndenge Nzambe alobaki ete ezali na yango. Azalaki wana, alobaki: "Nazali na nzala, bokeseni nini ezali na ntina na makoki ya bokulutu oyo ya kala? Okoki kozua yango soki olingi yango." Hólalá! Bomoni?

"Nasambelaka; nazali kaka malamumu lokola bino. Ebongiseli na ngai ezali mpenza lokola ... Ee, ezali moko kati na baoyo ya minene koleka na mokili. Mama na ngai azalaki mondimi na yango. Tata na ngai azalaki mondimi kuna. Nyonso *oyo awa, oyo kuna, mpe oyo mosusu*. Mokengeli na ngai azali moto oyo atángá; azali na *boye mpe boye*. " Yango ezali kopusa ye mosika mpenza na Nzambe. Wana ezali kiyungulu ya moto ya mayele te.

Soki ezalaki yango, ndenge nini Petelo akokaki kozala ndenge azalaki, na ntango oyo akokaki ata kokoma nkombo na ye moko te? Kasi azalaki na kiyungulu ya moto ya mayele. Botala. Hólalá!

53 Esau akanisaki ete makoki ya bokulutu wana elingaki na yango koloba eloko Nzambe alobaki ete ezali te. Yango ezalaki bokeseni kati na Bomoi ná liwa. Na bongo, lokola Ewa mpe lokola Yudasí, batekaki makoki na bango mpo na kosepelisa mpímbo ya boyebi ya mokili. Yango Ezali mpenza na ntina wana nde Ewa atekaki makoki na ye ya bokulutu. Atekaki yango mpo na kozua mwa elengi ya zebi, mwa mpímbo ya boyebi ya mokili, mwa lingomba moke ya malamumu koleka, mwa etonga ya bato ya malamumu koleka, ndenge ekoki kobengama lelo. Bomoni?

Mpe Yudasí atekaki makoki na ye ya bokulutu mpo na palata ntuku misato, na bongo abakisaki mwa ba-dolale mosusu likolo. "Etóngá na ngai ekoki kofuta ngai malamumu awa, boye nakoteya bobele awa." Bomoni? "Na bongo, soki nakómi motei, ee ..."

54 Balobaki: "Ndeko Branham, tondimi ete Nsango oyo ezali Solo, kasi tokoki koyamba Yango te. Soki toyambi yango, ee, biso tokoteya wapi? " Á! Mokili, ndeko, ezali nde parwasi. Ya solo. "Ee, moko te kati na bandeko alingaki kopesa ngai simbisi." Na—nazali koluka te ete moko kati na bandeko asunga ngai.. Nazali kotalela Yesu Klisto mpo na kosunga ngai, mpamba te Ye nde Atelemi mpo na Yango. Ye Moto alobaki Yango.

Boye ntango makoki ya bokulutu ya solosolo, Makila, elekisami na kiyungulu ya Liloba; masumu nyonso, ná mokili, mpe mangomba, ná bibongiseli, mpe mikabwano etikali libanda. Kelasi, bompensa, lingomba, ebongiseli, mimesano, lisumu ya lolenge nyonso ezali kotikala libanda ntango moto ya mayele azali kokamata Kiyungulu ya moto ya mayele, engebene Nzambe.

Ntango moto azali kolekisa bomoi na —na ye na nzela ya Kiyungulu na Nzambe, eloko moko te ezali kotikala; botala, liboso bomoi na yo ezalaki ya kobeba mpamba te obotámáki kati na masumu, osalámáki kati na lisumu na nko, oyaki na mokili kolobáká lokuta ."

Nakoloba likambo moko, ndenge Ndeko mobali McCullough azalaki na momesano ya koloba. Bóyoka ngai.

55 Ntango oyaki awa na mokili oyo, obotamaki kati na lisumu. Oyaki kutu ata na konzo moko ya kobunda te. "Obotamaki kati na masumu, zémi ezumaki na bokesene, oyáki na mokili kolobáká lokuta ," ozalaki kati na molimo na yo moko na mposa ya lisumu, ozalaki kolinga lisumu mpo ete obótámá kati na masumu. Ozalaki na libaku te. Kasi kuna na kati na yo, na esika moko, tala, eloko moko na kati kuna ebandaki koyemama. Soki óyébaka, ezalaki eloko moko oyo eyebisaki yo ete Nzambe moko azalaki esika moko; mpe okotangi Liloba na Ye. Na nsima oyambaki lingomba, okamataki makanisi na bango na ntango oyo olakisamaki malamumu, na boye osalelaki ata moke te Kiyungulu ya moto ya mayele. Kasi ntango osaleli Kiyungulu ya Nzambe, yango ezali mpo Kiyungulu ya moto ya mayele, mpo ete: "Bakiyungulu mosusu nyonso ekoleka, kasi oyo ya Ngai ekoleka te." Mpe soki ozui Kiyungulu ya Nzambe mpe olekisi bomoi na yo, bamposa na yo ... soki olekisi bamposa na yo na nzela ya Kiyungulu ya Nzambe, Kiyungulu ya moto ya mayele, eloko mosusu ekotikala te bobele Molimo Mosantu.

Sikawa, soki olingi ndanga ya Molimo Mosantu, yango wana. Ntango bomoto na yo ya kati etele mi na molongo ya Liloba na Nzambe, na limemia nyonso, yango etalisi ete olekisi bomoi na yo na Kiyungulu ya moto ya mayele, Kiyungulu ya Nzambe.

56 Botala, oyo nde ezali Kiyungulu ya Nzambe? Alobaki: "Tosukolami na mai ya Liloba."

Mpe ntango Nzambe apesaki Adama ná Ewa Kiyungulu, na elanga ya Edene, Alobaki: "Bolekisa ata eloko moko te ya oyo kuna." Kasi Satana atobolaki lidusu kati na yango, alobaki: "Ó, ezali kaka moke, ekossala mabe te." Bobele litangá moko, ekokaki mpo na kokotisa kúfa kati na bato.

Yango nde nyonso esengaki, bobele mpímbó moke ya nikotine, esilaki mpo na bango.

Eloko mosusu etikali te bobele Molimo Mosantu.

Mpe na nsima, yango ezali kotalisa ete kati na yo, momboto oyo ebongisámá liboso ezalaki kuna na kati na yo, oyo esalaka ete ózala na nzala mpo na Nzambe. "Bato nyonso oyo Tata apesi Ngai, apesi Ngai mpoi na kosikola; bakufaki elongo na Ngai na Gologota; basekwaki elongo na Ngai na lisekwa, baye banso Ye apesaki Ngai bakoya epai na Ngai. Bakotiana kati na Nzoto, esika ya lokolo, loboko, zolo, monoko, ata soki ezali nini; bango bakotiana wana. Mpe bakoya epai na Ngai na eleko na bango. " Ólalá!

57 Wana nde koyungolama ya solosolo ya masumu nyonso ya mokili, bongo bolingo ya mokili ekufi, mpe bomoto na kati oyo ezali na mposa ya eloko bobele moko. Yango oyo, bo ... Bobosana te! Bobosana yango te. Bino nyonso bozali kuna kolandáká na ba-telefone, bofandisa yango kati na milimo na bino. Ntango moto ya mayele abandi kokanisa liboso na Nani ye akotelema, mpe nini Liloba na Nzambe ezali; ntango abandi kokanisa, mpe ntango amilekisi na nzela Yango, eloko mosusu ekoki koleka wana te bobele Molimo Mosantu.

Ezali nini? Ezali momboto, momboto Liloba uta na ebandeli, ete ozalaki kati na Nzambe na ebandeli, kotelemáká awa na mposa ya momboto ya Bomoi. Momboto ezali kati na motema na yo, na nzela ya kobongisama liboso. Aleluya! Momboto esili kozala kuna na kati, na boyebi liboso ya Nzambe, kokánama liboso. Mpe ntango ezali koleka, ekoki koleka na nzela ya eloko mosusu te bobele Liloba.

Mpe na nsima ezali mpímbó ya moto ya mayele, ya moyengebene, moto ya bulee oyo azali komona Biblia, ete Yesu Klisto azali motindo moko lobi loleki, mpe libela. Eloko nini ezali kokota kuna na esika wana? Liloba oyo, yango nde ezali kati na motema. "Nazali kobomba Liloba na Yo na motema na ngai, mpo ete nasumuka kotelemela Yo te."

Ezali nini, ntango ezali koleka kati na Liloba? Eloko bobele moko ekoleka na Liloba; ezali nde Molimo Mosantu. Eloko bobele moko ekoki koleka na nzela ya Liloba, ezali Molimo Mosantu. Mpe Kiyungulu ya moto ya mayele ezali kopesa mpímbó ya moto na bulee.

58 Boye ameki elengi ya makambo ya Likolo; azali na Liloba na Nzambe kati na motema na ye. Amoni Yango komonisama liboso na ye, mpe bomoto na kati na ye mobimba ezingami kati na Yango, boye mokili mpe makambo nyonso ezali lisusu na bomoi te zongazonga na ye.

Kiyungulu ya moto ya mayele ya bosambeli, nazali sikawa kokanisa na ntina na bosambeli oyo eyungolami. Ntango Kiyungulu ya moto ya mayele epesi mpímbó ya moto ya bulee, bomoni, Yango ekosepelisa mpímbó na ye. Amoni ete Yesu Klisto azali motindo moko lobi loleki, lelo, mpe libela. Yango mpenza. Tozali mpenza komona Ye liboso na biso, kosaláká makambo moko oyo Asalaki; ezali kosepelisa mpímbó ya mosantu, mposa na ye.

Ayebi na boye ete asili kolongwa na kufa mpe kokota na Bomoi. Mpe alingi, mpe—mpe—mpe bolingo na ye mpo na mokili ... etatolama, boye alingi ete Liloba etatolama mpe emonisama polele. Na eleko moko na moko azali kozela Yango, mpamba te azali moto ya bulee mpe azali na mposa ya komona Nzambe. Bamosusu balingi bobele kosangana na lingomba. Moto yango alingi komona Nzambe. Azali komona Ye kati na liboke ya bindimeli te. Azali te komona Ye kati na bisalelo minene mpe kitoko ya mizíki, to kati na bakatedrale ná bikulusu milayi, to kati na bato ya mayele oyo balati kitoko ná ba nkingo ya bilamba na bango babalolá. Azali komona Ye kati na teoloji te, mpe kati na moto na teoloji te. Amoni Ye kati na kotatolama ya Liloba na Ye.

Namonaki Ye kati na móto na Yango.

Miso na ngai emoni nkembo ya boyei na Nkolo;

Azali konyata ebombelo na mbuma, epai miwiti na nkanda ebombami;

Afungoli mokalikali monene na mopanga na Ye ya nsomo na lombangu;

Solo na Ye ezali kokoba kokende liboso. (Ekokoba kino na suka. Iyo, misie.)

59 Bomoni likambo nalingi koloba? Kiyungulu, moto ... To, Kiyungulu ya moto ya mayele; moto oyo alingi kotelema Liboso na Nzambe. Kiyungulu ya Nzambe ezalaki nini? Liloba na Ye. "Mokolo okolia yango, mokolo yango okokufa." Oyo ezali kosalema bipai mosusu ezali na ntina te; koleka pembeni ya Liloba oyo te. "Asukolami na mai ya Liloba," Kiyungulu ya moto ya mayele. Ebongiseli moko te, endimeli moko boye te, lingomba te, katedrale te; kasi Kiyungulu ya moto oyo azali na mayele, mpamba te okosambisama na Liloba. Moto ya mayele akokanisa yango. Moto ya zoba oyo azali na mpímbó ya mokili akozua ata eloko nini; eloko mosusu. Mpo na nini kozwa eloko mosusu na ntango oyo solo ezali?

60 Bokanisa naino, bokanisa naino mwa moke. Mwasi oyo azali koloba minoko na sika, ná suki mikuse mpe apakoli ngola na bibebu, mpe lingomba ezali kokoba koloba ete yango nde elembeteli ya Molimo

Mosantu.

To motei moko oyo auti na seminele to na kelasi moko ya Biblia, azali kosalela libatizi ya bosato, to kokakola Liloba mpo na endimeli moko to mpo na ebongiseli moko boye. Wana nde Kiyungulu ya moto ya mayele? Ngai nazali komona yango bongo te, ndeko. Ezali moto ya zoba nde azali koleka na nzela wana. Ya solo. Bokoki kokanisa likambo yango? Na esika ya kosalela Liloba na Nzambe lokola Kiyungulu mpo na bomoto na ye ya kati; ye atiki endimeli wana ya kala mpe ebongiseli ekamata bokonzi likolo na ye ndenge wana, na esika ya kozua Liloba na Nzambe lokola Kiyungulu. Na bongo apoli mpenza mobimba, mpe atiki bango bakotisa kati na ye malakisi ya bato, kosaláká boko makambo, "pene na kozimbisa ata Baponami mpenza," mpe kotaláká Liloba na motuya te.

Na ntango akokaki kokótisa na bomoto na kati na ye moko, soki eloko moko ezali kuna na kati mpo na kobenda yango. Kasi soki momboto wana oyo ebongisámá liboso ... Bózanga likambo oyo te. Soki momboto oyo ebongisámá liboso ezali kuna na kati te, ekobenda yango Kuna te, mpo ete ekobenda uta na ba-mposa na yango.

61 Soki momeli likaya alingi kosepelisa mposa na ye ya momeli makaya, mpe soki akamati mwa eteni ya nzete ... Soki nayebisi ye: "Fiba mosapi na yo," bongo ye atelemei wana mpe abandi kofiba mosapi na ye. [Ndeko Branham afibi mosapi na ye lokola ndakisa— N.D.E.]

Ee, ye akoloba: "Ezali bozoba." Mpo na nini? Mpímbó na ye ezali ya nikotine. Na bongo, azali moto ya mayele te. Bomoni? Kasi okoloba: "Ee, ngai, nazali koyoka elengi na yango te. Nalingi koyoka mpímbó ya ... Nalingi koyoka mpímbó ya tumbako. Nazali koyoka ata eloko moko te. "

Pesa ye afiba eloko oyo esimbaka bilamba na nsinga mpo ekauka, Bomoni? Ya solo, tika ye anunga yango. Ye akoloba: "Nazali koyoka elengi moko te moko te." Bongo, onungaka yango mpo na nini kasi? Ezali nde mpo ozali na mposa ya koyoka elengi ya nikotine.

Bongo ntango ozali konunga endimeli ya lingomba, mpe bino basi bozali bobele kokata suki, kopakola langi na bilongi, mpe kolata bilamba oyo etalisaka nzoto; mpe bino mobali botali bango, mpe makambo nyonso mosusu wana, mpe bozali kokoba na lolenge bozali kosala. Ezali nini? Eloko nini ezali kuna na kati? Mokili ezali naino kuna na kati, mpe ozali na mposa na yango. Ozali kozwa bosepeli na yo kuna.

62 "Ngai nasambelaka na lingomba *songolo*; bango kutu batangaka nkombo ya eloko wana te. Balobaka eloko moko te na ntina na likambo *oyo*, eloko moko te na ntina na likambo *wana*. Moko te na makambo oyo elobamaka. Moteyi na biso afungwama miso koleka wana. Tolobaka makambo ya ndenge wana te. " Ezali nini? Ozali na mpímbó ya mokili, ozali nde konunga yango. Ya solo!

Kasi mwasi oyo azali na mayele akozua makambo ya ndenge wana te. Ayebi ete asengeli kozala mosántu. Mpe eloko bobele moko okoki kobenda na Liloba na Nzambe ezali Molimo, Nguya oyo ezali kopesa bomoi ekosala ete Liloba Yango moko oyo ezali kati na yo, ebíka mpo na komonisa Yesu Klisto na eleko oyo ozali kobika kati na yango. Aleluya! Ndeko, soki ezali Solo te, wana nayebi te soki Solo ezali nini. Nabungisi makanisi na ngai soki ezali Solo te.

Ezali Liloba Yango moko kati na motema na yo, oyo ebongisámá liboso, nde ezali kosala mosala. Boye ezali kobwaka mokili wana libanda; elingi yango te. Kasi ntango ezali kokoma awa na Liloba, ekobanda kobenda. Bongo ntango ebendaka na nzela ya Liloba, ekoki kozala eloko mosusu te bobele Molimo Mosantu, mpo na kopesa bomoi na Liloba yango.

63 Na bongo Kiyungulu ya mosambeli ya mayele ezali Liloba, mpe esepelisaka mpímbó mosantu wana oyo ezali na kati ya motema na ye; Kiyungulu ya moto ya mayele, mpímbó ya moto oyo azali mosantu. Ô, la la!, eloko nini oyo tozali kati na yango!

Na esika ete asálela Kiyungulu ya Nzambe mpo na bomoto na ye ya kati, ye azali kotika Satana apéngwisa ye na ebongiseli moko to endimeli moko, ndenge moko mpenza lokola ba-kompani ya tumbaku bazali kopengwisa bino bato oyo bomela makaya. Bozali bobele kozwa bandimi mingi, esili na yango.

Oh, tika ngai nasilisa na mwa miniti moke, nakolobáká boye.

64 Laodikia mokufi miso! Kino wapi tokoki kokoma bakufi miso! Laodikia mokufi miso, kokambáká bakufi miso ya eleko oyo na nse ya makambo ya lokuta, bindimeli ya lokuta, mateya oyo ezali lokuta, ebongiseli oyo ezali ya lokuta, babuku ya bindimeli oyo ezali lokuta. Ô, mokufi miso Laodikia, kokambáká bakufi miso, bino nyonso bokokweya na libulu!

Bongola kiyungulu na yo na mpokwa oyo, moteyi. Bobenda nicotine wana ya mateya mpe bindimeli ya bibongiseli kati na bino te, mpo ete Yesu alobaki: "Moto nyonso oyo akobakisa to akolongola liloba moko na Yango." Ntango oyebisi losambo na yo ete ezali malamumu mpo na basi kosala *boye*, mpe mibali kosala *boye*, mpe makambo nyonso wana, likambo *oyo* mpe *mosusu*, na ntango nyonso bazali kotikala sembo na *oyo* mpe kosala oyo *wana*, mpe bazali kobatela bindimeli wana mpe makambo mosusu; ozali

koyoka nsoni te?

“Bafalisai bakúfi miso,” Yesu alobaki.

65 Mpe lokola Yesu, “Bafalisai bakufi miso,” Molimo Mosantu kati na motema na ngai na mpokwa oyo azali kobeleva, “Laodikia mokufi miso! Mbala boni Nzambe alingaki kopesa yo kolamuka! Kasi sikawa ntango na bino ekoki; ntango esili koleka sikawa. Boni bino bosesaki mpe botyolaki bato oyo Nzambe atindelaki bino! Kasi sikawa ntango na bino ekoki. Ô Etats-Unis, Etats-Unis, boni Nzambe alingaki kozipa yo lokola so—soso akosangisaka bana na ye na nse ya mapapu na ye, kasi bolingaki te.” Sikawa Mongongo oyo ezali kotambola ngambo na ngambo, longwa na likolo kino na ngelé, mpe longwa na monyele kino na eloli. Boni Nzambe alingaki kozipa yo na mapapu na ye, kasi olingaki te! Sikawa ntango na bino ekoki.

Mabota ezali kopanzana. Mokili ezali kopanzana. Eteni moko ya molai ya ntaka ya bakilometele nkóto mibale na nkáma minei mpe bonene ya ba kilometele nkama minei na ntuku mwambe to nkama motoba na ntuku minei ekodinda, na nkama ... to ntango mosusu na bakilometele ntuku motoba na minei na nse ya libulu wana kuna moko na mikolo oyo, mpe mbonge ekotobeta makasi kino na etuka ya Kentucky. Bongo ntango ekosalema, ekoningisa mpenza mokili makasi na lolenge ete biloko nyonso oyo ezali likolo na yango ekoningana.

Ô, bomba ngai kati na Libanga ya bileko! Nzambe, tika ngai, tika ngai. Pémá likolo na ngai, Nkolo. Molimo ya Nzambe na bomoi, pemela ngai. Tika ngai nakamata Kiyungulu ya Nzambe mpe nabika na nse na Yango, Nkolo. Tika ete napéma mopepe kitoko ya Molimo Mosantu kati na mimpululu na ngai, kati na molimo na ngai mokolo na mokolo, mpo ete nasumuka te liboso na Yo, Ô Nkolo. Pémá likolo na ngai, Molimo Mosantu, pémá likolo na ngai! Na ...

66 Tika ete nalóna Liloba na Nzambe kati na motema na ngai, mpe Sala ete nabkende te na loboko ya mobali to na loboko ya mwasi, mosika na Yango, kasi natikala sembo na Yango mikolo nyonso ya bomoi na ngai. E Tata Nzambe, na nsima tinda likolo na ngai Molimo Mosantu ya Bomoi, mpo na kopesa bomoi na Maloba oyo, ete nákoka kotalisa Yesu Klisto liboso na baoyo bazali liboso na ngai, kozeláká ete yango ekokisama. Yango nde libondeli na ngai.

Olalá! Botala ndenge basalaka lelo kati na mangomba wana. Bazali kokotisa bato kati na likita ya bosangisi mangomba na nzela ya bakiyungulu ya bibongiseli. Mpo na nini? Mpo na nini? Mpo epesaka bango mposa ya mitema na bango, ebongiseli. Bazali na mpímbo ya ebongiseli. Bakosala yango.

Ntango nyonso Nzambe azali kotindela bango kolamuka, mpe bango, bazali kosala nini? Bazali kokómisa yango ebongiseli. Boye te? Na bongo bazali na kiyungulu ya lolenge na bango moko, mpo bazali na mpímbo moko boye. Na yango, Nzambe akopesa bango mposa na bango na kolanda mpímbo na bango. Akopesa bango ... Bazali kobenda bango mbala moko kati na likita ya bosangisi mangomba, mpe na bongo bazali kozwa mpímbo na bango ya ebongiseli na ntango wana. Yango nde ezali kosalema.

67 Ô, lingomba ya Laodikia, bopengwisama te na eleko oyo, na nzela ya bokosi na bango. Ô, Pantekote, yo oyo okoti kati na Laodikia, yo oyo ozali eteni ya Laodikia, lingomba ya kokufa; na nzela ya ba-Metodiste, ba-Batiste, mpe ba-Presbiterien, kaka milulu mpamba. Kasi bino ba-Pantekotiste oyo bokoki na bantango mosusu koloba “amen”; bokomi na kokotisa miziki mingi na eteyelo mpe kotika basi oyo bakati suki kobina bina bisika nyonso, mpe ata bongo kondima lobiko na nzoto kouta na Nzambe; mbala boni Nzambe alingaki kokamata bino, kasi bozwi kiyungulu mosusu, kiyungulu ya ebongiseli. Mbala boni Nzambe alingaki kokamata bino!

Boni ezalaki na kopengwisa! Matai 24:24, Yesu alobaki ete ... “Ekopengwisa Baponami mpenza soki ekokoki nde kosalema.” Boni bobele mi na yango, kaka lokola Ewa, botiki pembeni eloko moko to mibale oyo boboyi koyamba, mpo bomikomisi ebongiseli, na bongo bokoki koyamba Yango te Yango nde nyonso ezali kosenga. Ekozala malamú bokamata mobimba na yango; “Mpo ete kobuka eloko ya moke koleka, ezali kobuka mobimba na yango.” Ô

68 Pantekote, Pantekote, lekisa makanisi na yo na nzela ya Kiyungulu ya Nzambe kasi na nzela ya ndoto na yo ya ebongiseli te, bongo okobima ná mpímbo ya moto ya bulee, libatizi ya solo ya Molimo Mosantu.

Bokoki kokanisa mobali moko kotika mwasi na ye akáta suki na ye, aláta bakupe, to ba-patalo, mpe na nsima alóba ete aleki na nzela ya Kiyungulu ya moto ya mayele? Bokoki kokanisa mobali mpenza ázála likambo ya boye?

Bokoki kokanisa motei moko na eteyelo, oyo mpo afutamaka malamú na eyanganelo oyo ezali kopesa ye longonya, kobenga ye “nganga mayele, Ndeko, Mokambi,” mpe bazali komema ye na baféti ya ndenge ndenge epai wapi mibali mpe basi basukolaka esika moko mpe makambo mosusu nyonso, komema ye pembeni ya mai; bokoki kondima ete moyo yango áloba ete aleki na nzela ya Kiyungulu ya moto ya mayele?

Mpe basi mosusu wana na ebaelo, ná bilamba na bango mikuse likolo ya mabólóngó mpe ezali mpenza



kokanga bango na nzoto kotalisáká lolenge na bango nyonso wana bazali kotambola, mpe bilamba yango ezali kotalisa bilamba na bango ya kati; ezali kaka mabe lokola kolata bakupe, bikini, to eloko mosusu nyonso. Bino bateyi ya ba-Pantekotiste, bakufi miso ya laodikia, ntango boni Nzambe akoyikela bino mpiko? Ngai nayebe te. Zala ... Nzambe ázala na mawa mpo na—na miso na bino ya kokufa. Azali na nkisi ya miso na mpokwa ya lelo mpo na kofungola miso na bino, mpo bokoka komona.

69 Ndenge nalobaki na ntongo oyo, tozali kati na eleko ya komona, na nsongé. Makoki mosusu ezali likolo na yango te, libanda na yango mpo na koyeba. Na zolo na yo, okoki koyoka nsolo; na bibebu na yo, okoki koloba; na maboko na yo, okoki komama mpe kosimba; mpe na makolo na yo, mpe bongo na bongo; kasi okoki kokende mosika ya miso na yo te.

Malaki 4 ayei; komona! “Na ntango na mpokwa Pole ekozala.” Ô, botambola kati na Pole!  
Tokotambola kati na Pole, Pole kitoko,  
Oyo ezali koya esika matanga ya mamwe ya mawa ezali kongenga.  
Ngenga zongazonga na ngai na moi mpe na butu,  
Yesu, Liloba, Pole ya mokili.

Iyo, misie. Ô ndeko, leka na nzela na Yango, okobima ná mpímbó ya mosantu, ná Molimo Mosantu.

70 Ô mwasi, lekisa kaka makanisi na yo ya bilamba ya mikolo oyo. Bolekisa makanisi na bino ya mikolo oyo, yambo na bino kobima na balabala liboso ya mibali; bino bilenge basi, bino basi baye basili kokola, liboso ete bobima na balabala ná bilamba oyo ekangi bino makasi na nzoto mpe ezali kotalisa lolenge na bino nyonso. Nazali koloba mabe te. Nazali ndeko na bino ya mobali. Natelemi kati na bato ya bomoi mpe bakufi, mpe nayebe eloko nazali koloba. Liboso ya kobima, boyeba ete nzoto na bino ezali eloko moko ya bulee, to efandelo moko ya bulee oyo Nzambe apesi bino; liboso na yo kobima na balabala olati na motindo wana, lekisa makanisi na yo na Kiyungulu ya mwasi ya mayele. Mpe bobosana te, ete: “Moto oyo atali yo na mposa mabe, osili kosala ekobo elongo na ye.” Kobosana yango te, ndeko mwasi.

Mpe ndeko mobali, yambo ete óbalola moto mpo na kotála mwasi yango mpo na mbala ya mibale, lekisa makanisi na yo na nzela ya Kiyungulu ya moto oyo azali na mayele. Okobima na mpímbó ya mosantu, omoni, ya kosalaka makambo oyo ezali sembo.

71 Botala, soki olekisi makanisi na yo na nzela ya Kiyungulu ya mwasi oyo azali na mayele, okobima ná elamba ya mwasi mosantu. Ya solo. Okobima, ndeko mobali, ná etaleli ya moto ya bulee. Sikawa, oyo ezali bobele eloko moko.

Mpo na eloko nyonso ozali kosala, lekisa yango na nzela ya Kiyungulu ya Liloba na Nzambe, tala soki ezali malamau to mabe.

Okobima ná elamba ya mwasi mosantu, ná suki ya milayi, oyo alati malamau; azali na molimo ya kimia mpe ya komikitisa; ezali te oyo azali kotomboka, mpe kobundabunda mpe kosala makambo ya mabe. “Molimo ya kimia mpe ya bopolo, oyo ezali na motuya monene mpo na Nzambe.” Biblia elobi bongo.

Sikawa nalingi kotuna bino likambo moko, na bino oyo bozali kati na mboka. Tokosilisa na mwa miniti moke.

72 Sikawa tika ete biso nyonso totala malamau ba mposa na biso, bongo nde bokoki komona soki boleki na lolenge nini ya kiyungulu. Tika tótala malamau, moko na moko na biso, awa mpe libanda na ekólo mobimba. Tála ba mposa na yo, eloko nini mpenza olingi kati na bomoi. Tála soki ozali kobunda mpo na likambo nini. Tála malamau soki ozali awa mpo na eloko nini. Tála malamau ntina oyo okendaka na losambo. Eloko nini epesaka yo ... Ezali malamau kokende na losambo, kasi kokende bobele na losambo te; yango ekobikisa yo te. Bomoni? Botala malamau bobele mwa miniti moke, bóloba: “Ntina na ngai ezali nde ... Kiyungulu—kiyungulu ya ndenge nini kutu nazali koleka na kati na yango? ”

Boye soki olingi kotambola na Liloba na Nzambe te, mpe bomoto na yo ya kati ezali kosala yango te, wana eloko moko ezali kotambola malamau te; mpo ezali kotalisa mpímbó na yo, ete bomoi ... bomoi ya ndenge nini ezali kati na yo. Soki ezali mosantu, ya lokumu, ekobima mpe bongo. Soki ezali bongo te, ozali na mpímbó mosusu kati na yo oyo ezali kokamba yo. Ezali mpenza ya solo.

Bongo soki mpímbó yango ezali Liloba na Nzambe mpe mokano na Nzambe, wana oyebi oyo ezali kati na yo, eloko nini ezali kokamba mpímbó yango. Etalisi ete ozali eteni ya Liloba yango. Liloba wana ezali kati na yo, kobendáká nguya uta na Liloba.

73 Ezali kobimisa nini? Ezalaka ntango nyonso katikati ya Liloba, mpo ozali eteni ya Nzoto na Klisto oyo. Mpe soki Liloba yango ezali kati na yo, Ekoki bobele kobenda na nzela ya Yango Molimo oyo ezali kolamusa Liloba oyo ezali kati na yo. Liloba yango moko ekoki kobika te. Yango wana, “Oyo nyonso Tata apesi Ngai bakoya epai na Ngai; mpe soki Nakonetolama, Nakobenda bato nyonso epai na Ngai.” Bomoni? Bomoni, “Tata,” eteni ya Nzoto na Klisto oyo ezali na mokili, oyo ebongisámá liboso, etiami kati na motema.

Moto nyonso oyo azali Moklisto ya solosolo lelo, abotami mbala na mibale, ayebi uta azalaki mwana moke, to mwana mwasi moke ete eloko moko ezalaki kati na yo oyo ezalaki na nzala ya Nzambe. Mpe omekaki kosangana na mangomba mpe makambo nyonso mosusu; yango etambolaki te. Ezalaki nini? Ezalaki Liloba oyo. Ozalaki koluka Kiyungulu. Mpe mokolo moko, Emonanaki liboso na yo; omonaki Yesu Klisto motindo moko lobi loleki, lelo, mpe libela. Yango esepelisaki mpímbo na yo. Bomoni?

Mpamba te, bomoi kati na yo ezalaki kobenda. Bomoni, bomoi kati na yo ezali kobenda. Ezali—ezali kotalisa motindo ya mposa ozali na yango awa. Ozali kobénda. Okoki te kobénda na nzela oyo, mpe oyo *kuna*, mpe oyo *mosusu*. Osengeli kozwa Kiyungulu wana ya malamumu mpenza, mpo ozali moto ya mayele. Bomoni?

Soki ozali moto ya mayele, obongisámá liboso, to lolekisámá na Kiyungulu liboso ... liboso na kozalisama ya mokili.

74 Mpe soki motei moko ya ebongiseli ayoki yango, nalikyi ete ázwa Kiyungulu ya moto ya mayele, soki azali motei ya ebongiseli. Wana akobwaka liboke wana ya ebongiseli oyo ekokufa na ntembe te, mpo ete ezali liloba ya moto; mpe akoyamba Liloba ya Nzambe oyo elekisami na kiyungulu oyo ekoki kokwea to koleka soko moke te, mpe yango ekosepelisa mposa ya moto mosantu. Mpe lokola Yakobo, okotika nyonso, mokili ná ba mposa ya bibongiseli nyonso to ya lokumu nyonso oyo ezali na mokili, esika okoki kozala epískópo, kardinale, mokonzi ya lingomba moko to mokengeli na lingomba moko monene. Okotika makambo nyonso oyo ezali. Lokola Esau te, mpo na kokóma eteni ya mokili; kasi lokola Yakobo, okopesa biloko nyonso ozali na yango mpo na kozua ya makoki ya bokulutu, Kiyungulu ya moto ya mayele; mpo Ekopesa yo mpímbo ya moto ya bulee. Mpe Yango ekosepelisa. Bongo Yango ekopesa bosepeleli mpe ekobulisa yo na mpímbo ya seko ya boboto na Nzambe.

75 Bokanisa lisusu, Satana atobolaki lidusu ya liboso na boongo to na makanisi ya Ewa, mpo na kotika ete mpímbo ya bwanya mpe boyebi na ye eleka na nzela yango.

Sikawa bokanisa likambo oyo. Nalingi násilisa. Satana atobolaki lidusu ya liboso, mpo oyo nyonso Ewa akokaki koyamba ezalaki Liloba. Yango ezalaki Molimo na nzela na Liloba na Nzambe, mpo ete alobaki: "Na ntango nyonso oyo ozali kopema na nzela ya Kiyungulu oyo, okokufa soko moke te; kasi soki obendi mpema na oyo ezali libanda awa, yo okokufa. " Bomoni?

Bongo Satana alobaki: "Kasi oyebi eloko moko te awa. Kasi soki omeki moke mpímbo ya oyo awa, wana okoyeba; okozala lokola Nzambe. Bomoni, Ayebi malamumu ná mabe; kasi yo te. Boye soki bobele omeki elengi moke ya oyo. " Bongo Ewa atikaki ye atobola lidusu kati na yango, kaka mwa lidusu moko ya moke.

Sikawa bomoni mpo na nini nalobi ... Yo okoloba: "Mpo na nini olakisaka basi te, mpe bongo na bongo, ndenge nini koyamba makabo mpe makambo ya ndenge wana?"

Ngai nayanolaki: "Ndenge nini okoki kolakisa bango mituya ntango balingi kutu koyeba A-B-C na bango te?"

Mwa lidusu moke, nde nyonso esengelaki. Akamataki bwanya ya mokili, bongo ntango asalaki yango, ekotisaki kufa na libota mobimba, likolo ya mposa na ye ya bwanya.

76 Sikawa botala kiyungulu yango, mpe na ntembe te etalisaki mpímbo na ye, Ewa. Mpímbo na ye ezalaki ya mokili; yango nde eloko azwaki. Ezali mpe bongo lelo. Balingi mokili mpe makambo ya mokili, ná lolenge ya bosantu, kasi bazali kowangana nguya na yango. Bomoni, Satana akotika bango baloba minoko na sika; akotika bango bagánga; akotika bango bazala na mayangani ya lobiko na nzoto kouta na Nzambe; akotika bango basala makambo nyonso ya ndenge wana.

Yesu alobaki: "Mingi bakoya epai na Ngai na mokolo wana, mpe bakoloba: 'Nkolo, ngai nabenganaki milimo mabe te, nasalaki makambo mingi te, nasalaki *boye*?' " Ye okoloba: "Nayebá ata yo te, yo mosali masumu na nko." Ntango Liloba etiamaki mpenza liboso na yo mpe yo okobaki konunga kiyungulu wana ya kala kala ya mokili, bomoni, yango etalisi mpímbo oyo ézali kati na motema na yo.

77 Bibenga bakoki kolia bipola te. Bakoki kolia yango te. Bazali na mai ya bololo te. Yanganga akoki kolia momboto lokola ebenga mpe akoki kolia bipola lokola yanganga, bomoni, mpo azali mokosi. Kasi ebenga etongami te lokola ndeke mosusu, mpe yango nde ntina Nzambe amitalisaki lokola Ebenga kouta na Likolo. Bomoni? Ekoki te—ekoki koyikela nsolo ya bipola mpiko te. Ezali engondó te; yango nde ntina ye azali na mai ya bololo te. Ekoki kolia yango te. Ekoboma ye, soki elié yango.

Mpe ebenga azali ata na ntina ya kosukola te. Nzoto ya ebenga ebimisaka mafuta longwa na kati, mpo ezala ntango nyonso peto. Ezali bomoi oyo ezali kati na ebenga; ebotaka kati na ye mafuta oyo ebatelaka nsala na ye peto. Ezali mpe bongo mpo na Moklisto; Bomoi moko ezali kati na bango, oyo ebatelaka bango peto. Elekisami na Kiyungulu.

Ô, botala! Sikawa botala malamumu ... kiyungulu, mpe na ntembe te bokoki komona mpímbo ya makambo bazaliu kosala lelo.

78 Botala lingomba oyo ya mikolo oyo. Botala kiyungulu na bango. Bokoki komona biloko oyo balingaka. Botala oyo bazali na yango. Bolingo, bango balingaka nini? Madame Laodikia oyo azali kokende liboso na Kosambisama na Nzambe. Ya solo. Bolingo, bolingo ya lingomba lelo ezali mpo na Laodikia, ebongiseli moko monene, ndako moko monene, eloko oyo eyebani, bato ya lokumu oyo balataka malamumu, bato oyo bayekola mingi, batondi na bwanya, batondi na diabulu, na nse ya lipengwa ya lingomba ya Klisto. Liloba bobele moko esengelaki kozala kuna: "motelemeli na Klisto." Mpamba te bazali kotelemela mpenza makambo nyonso Klisto ateyaki; ya solo, bazali na oyo ekoki mpenza mpo na komibenga bongo.

Sikawa soki bozali bato ya mayele na mpokwa oyo, awa mpe libanda kuna na mboka esika Nsango ezali kokende, mposa na bino ekozala mpímbo ya Biblia, kasi ya ebongiseli te, mpamba te bokosambisama mpenza na Biblia, Liloba oyo ngai nazali kosenga na bino ete boleki bomoto na bino ya kati na nzela na yango. Mpe koboya Liloba moko na Yango, mpe koboya kotika ete bomoto na bino ya kati eleka na nzela ya Liloba wana moko, bókobwakama. "Mpamba te, moto akobika te, kopema te, na lipa bobele, kasi na Liloba nyonso ekobimaka na monoko na Nzambe."

Yango ekotiamu kati na bino baye bobongisamaki liboso. Bongo ntango Nkolo apemeli bino, Molimo na Ye ekopesa bomoi na Liloba oyo na kokomisáká yango solo, boye bino bokomona ete Yesu Klisto azali ndenge moko lobi loleki, lelo, mpe libela. Ôlalá!

79 Botika paké wana ya ebongiseli mpe bosambeli ya mokili. Botika yango na mabélé lokola paké wana ya makaya na zamba. Botika yango epola mpe ebeba. Ezali—ezali kiyungulu ya mabe. Boye bozua Liloba, oyo ezali Klisto, yango nde epesaka mpe ebatelaka mpímbo ya Bomoi na Seko, mpo na moto nyonso oyo akokamata Yango, Bomoi na Seko.

Liloba, soki obongisámá liboso, okomona Yango. Nzela ya kobombela yo Yango ezali te. Yo okotala wana mpe okoloba: "Ee, Ezali mpenza polele liboso na elongi na ngai! Nazalaki kotala Yango; Yango oyo. Nazali kotala Yango mbala moko. Namoni Yango. Yango oyo, Liloba; Liloba nyonso, Liloba moko na moko komimonisáká. " Boye, ezali wana na mpímbo ya Bomoi na Seko, oyo yo ozali na mposa na yango.

Boye ntango opemi na nzela na Yango, eloko nini ekoki koleka na nzela na yango, na nzela ya Kiyungulu na Nzambe? Eloko mosusu te bobele Molimo; mokili te, ata moke te; bozangi kondima te; ata moke te. Ezali Kiyungulu ya Nzambe. Bongo ntango ozali kopéma na nzela na Yango, eloko moko te ekoki koleka, bobele Molimo Mosantu.

80 Sikawa ozali na ndanga ya Molimo Mosantu, bomoni, mpímbo ya mobali to mwasi ya bulee. Bazali na mposa ya kozala na bomoi. Bazali na Bomoi na Seko. Bongo lokola Liloba oyo ezali bomoi na bango, bazali kobika; Kiyungulu ya moto ya mayele, mpímbo ya moto oyo azali mosantu.

Bókamata mokili te, Impe bokosama na yango te lokola bakompani oyo ya makaya, kasi bókamata Kiyungulu ya solo solo ya moto ya mayele. Boleki na Kiyungulu mopepe oyo bozali kopema, bilei oyo boliaka, oyo nyonso bozali; bopema yango na nzela ya Liloba na Nzambe, na bongo bokozala na mpímbo ya moto oyo azali mosantu. Yango nde eloko ekobimisa, mpo Ye Azali motindo moko lobi loleki, lelo, mpe libela.

Mpe nayebi, soki tozali to te ... Nandimi ete tozali bongo. Kasi soki tozali yango te, moto moko azali eteni ya Nzoto na Klisto na mokili lelo oyo; mpe ye akobika bobele na Liloba na Nzambe, Liloba nyonso oyo ebimaka na monoko ya Nzambe mpo na eleko oyo tozali kobika kati na yango sikawa.

81 Boye nakoki komona te esika bibongiseli ... Maloba yango kati na Biblia elobi mpenza polele ete ekosalema, ná mpe makambo oyo ekozala, mpe tala biso oyo tozali kobika kati na yango sikawa. Nakoki komona te ndenge ekoki kozala eloko mosusu soki oyo te.

Lingomba, nasosoli ete nasengeli kotelema elongo na bino na Kosambisama mokolo moko. Mosika na ngai likanisi ya koyebisa bino likambo moko ya lokuta, mpo na lokumu. Nalingi yango te. Soki esengelaki nakokisa mposa na ngai, nalingaki, mposa na ngai ya bomoto, nalingaki kokamata bondóki na ngai mpe kokende na zamba, komitongela mwa ndako mpe kokanga banyama mpo na bomoi na ngai mobimba. Nazali kokoma mokolo, kolemba, kosila makasi mpe konuna; kasi nakoki kotika te. Eloko moko ezali kobaluka na kati na ngai. Mawa na ngai soki nalobi Solo te, Solo mobimba. Mawa na ngai soki natelemi awa te kino mpema ya suka ekobima na nzoto na ngai. Nasengeli kotelema ngui, ata soki moto mosusu alobi nini. Nazali na mokumba liboso na Nzambe.

82 Mpe nandimi mpenza ete makambo tozali koteya ezali Solo. Ezali te mpo ete ngai nde nazali koteya yango. Te, ndeko na ngai. Te, misie. Nzambe ayebi motema na ngai. Boni nakolinga kofanda na liyangani mpe koyoka liteya oyo epakolami. Boni ekozala mpenza pete mpo na ngai, na ntembe te, mpo nakozala na Bomoi na Seko kaka lokola moto oyo azali na eteyelo. Nazali eteni na Yango ndenge moko lokola ye. Nakokende na Lola moko, nakozala na matómba moko. Boni ekokaki kozala pete mpo na ngai kofanda

kuna mpe nazánga kozua bampota nyonso ná bibotu mpe makambo nyonso wana. Boni ekozala pete, mpo sikoyo nasengeli kotikala butu mobimba kozanga kolala, kobunda mpo na ngonga moko na ndambo to mibale mpo na makambo oyo ezali kosalema. Boni ezali pete mpo na ngai kosala bongo, kokamata bondóki na ngai na ntongo oyo elandi, nsinga na ngai ya kolóbo mbisi, mpe kokende kolóbo to kosala bokila! Boni ekozala mpenza pete! Ndeko, yango ekomi mokumba na ngai. Tika Nzambe ázunga ngai ete nakima esika na ngai ya mosala soko moke te, kasi nátélema sembo mpe solo, boye napesa na bino Kiyungulu ya moto ya mayele oyo ekopesa bino mposa ya bulee.

Kiyungulu ya moto ya mayele ezali nde mai, mai ya bokabwani. Ezali kopetolama na masumu na nzela ya Liloba na Nzambe. Mpe moto ya mayele, oyo ayebi ete asengeli kotelema liboso na Nzambe, ayebi ete asengeli koyanola mpo na Liloba moko na moko ya Biblia, Yango ekosepelisa mposa wana oyo ezali kati na motema na yo. Tika ete Nzambe ázunga biso mpo toyamba Yango, wana togumbi mitó na biso.

83 Nzambe Molingami, ngonga moko to mibale euti koleka. Saa esili kokende liboso sikawa. Nsango ekoti sikawa na mambi maleki, ekomami kati na Buku. Bisó nyonso tosengeli koyanola sikawa mpo na likambo oyo, Koningana nyonso oyo tokosalaka, liloba nyonso oyo tolobaka, likanisi nyonso oyo elekaka na makanisi na biso, bande ezali bobele kokanga. Mpe bande yango ekokoba kokanga kino bomoi ekosila, bongo na nsima, tokozongisa monoko na Mokolo ya Kosambisama.

E Nzambe, Mokeli monene ya likolo mpe ya nse, Oyo biso tozali mpenza kondima, nabondeli mpo na bato ya eleko oyo. Nabondeli mpo na ngai moko mpe elongo na bango, ete Nkolo Yesu, ete Osimba Kiyungulu na Yo. Mpe soki nazali koloba likambo ya kotúka, Nkolo, na ... na kati ya motema na ngai nayebi yango te. Nabondeli ete soki ezali mabe mpo na ngai kokamata Liloba na Yo mpe kosalela likambo ya boye, Limbisa ngai mpo na yango.

84 Kasi, Nkolo, nakanisaki ntango Olobaki na ngai kuna na zamba, Oyebi, na ntongo wana, nakokaki kolongola yango na makanisi na ngai te. Nazwaki yango lokola koutáká na Yo. Boye Tata Nzambe, nasili koloba yango. Mpe nabondeli, e Nzambe, ete Ótika Yango ézala lolenge nakanisaki ete ekozala, ete moto oyo akanisaka, soki azali na mwa mayele, akoyeba ete asengeli kotelema Liboso na Nzambe, na yango akotika te eloko moko ya kopola to oyo ekeseni na Liloba na Nzambe ékota na bomoto na ye ya kati.

Mpe, Tata, tososoli ete, ndenge nakokanisaki yango na bibongiseli ya lelo, ezali te mpo nákesana na basusu, Nkolo. Okosambisa ngai, mokolo moko, mpo na oyo ezali na motema na ngai. Mpe nabondeli, e Nzambe, ete Omóna ete ezalaki te mpo nákesana na basusu, kasi ezalaki mpo názála sembo, mpo na komeka kozala sembo, koyebáká ete nasimbi kosikolama ya Makila na Yo, kobanda na ngambo moko kino na ngambo mosusu, sikawa, na loboko na ngai. Mpe mingi kati na bango bandimi liteya yango.

Mpe, e Nzambe na Lola, tika ete moko te kati na bango abunga. Nasengi bango, bango nyonso, mpe nasimbi liboso na bango Kiyungulu kotelemela lisumu, Mai ya bokabwani, Makila na Yesu Klisto, Liloba oyo ekomi nzoto. Kokisa yango, Nkolo. Mpe tika ete Molimo Mosantu ámisopa na nzela ya bilaka nyonso, kati na bomoto na biso ya kati. Mpe tika ete biso tozala batalisi oyo bazali na bomoi ya Mwasi na Libala ya Yesu Klisto, na ntango ya miso, ya bomoni ya Pole na mpokwa, mpamba te tosengei Yo yango na Nkombo na Yesu Klisto. Amen.

85 Bolingi Ye? [Losambo elobi: "Amen." — N.D.E.] Bondimi Yango? ["Amen."] Na, soki nalobi likambo moko ya mabe na kokamata lokola motó: "Kiyungulu ya moto na mayele," nakoki koloba lolenge mosusu te. Natángá mingi te. Nasengeli bobele koloba makambo oyo ezali koyela na ngai. Bongo ntango namonaki yango wana na mabele, nakanisaki: "Oyo nde bokosi!"

Mpe Eloko moko elobaki: "Kaka lokola lingomba."

Kiyungulu ya moto na mayele! Ólalá! Likambo esuki kaka wana te. Moto ya mayele akosalela yango ata moke te. Bomoni? Ata moke te. Kasi yango ekosepelisa mposa ya mobendi likaya, ya solo, mpo asengeli kozala na yango mpo na kosepelisa na ye. Kasi moto ya mayele ya solosolo, oyo ayebi ete bomoto na kati na ye ekokende na Kosambisama, akolekisa na kiyungulu ya Liloba na Nzambe mposa to mpímbo na ye. "Mpo baoyo nyonso Tata apesaki Ngai bakoya epai na Ngai." Mpe akobika na Liloba nyonso oyo ebimaka na monoko na Nzambe, yango nde Mai ya bokabwani oyo ezali kokabola biso na masumu. Mpamba te, ntango eleki na nzela ya Liloba, tomoni ete kozanga kondima Yango ezali lisumu, na bongo tozali bobele kondima Yango mpe kokende liboso. Ezali kokabwana na masumu. Bolingi Ye? [Losambo elobi: "Amen." — N.D.E.]

Nalingi Ye, nalingi ...

Sikawa totombola bobele maboko na biso epai na Ye.  
Mpo Alingaki ngai liboso  
Mpe Asombi lobiko na ngai  
Likolo na Ekulusu.

86 Alobaki nini? "Na bongo bato nyonso bakoyeba ete bozali bayekoli na Ngai, soko bolingi, bozali na

bolingo kati na bino." Sikawa topesana mbote ya maboko wana tozali koyemba yango lisusu, mpe tólóba: "Nalingi yo mpe, ndeko."

Nalingi Ye, na ... (Oyo ezali mpo boyeba ete ...)  
... Alingaki ngai liboso  
Mpe Asombi lobiko na ngai  
Likolo na Ekulusu.

87 Sikawa, bolingi Kiyungulu ya moto na mayele? [Losambo elobi: "Amen." — N.D.E.] Ntango okobima na balabala lobi mpe okosangana na mokili, ndeko mobali, ndeko mwasi, ozali na Kiyungulu ya moto na mayele? Ntango mobali wana abengi yo "motúntuki", yo ozali kosalela Kiyungulu ya moto na mayele? Ntango moto moko alobi eloko moko ya mabe kotelemela yo, ozali na Kiyungulu ya moto na mayele? Bomoni, sala malamau mpo na mabe. Bóbondela mpo na baoyo bazali kosala bino mabe, mpe konyokola bino, na bongo bozali kopema na nzela ya Kiyungulu ya moto na mayele.

88 Mpo ete soki bolingi bobele baoyo balingi bino, ndenge touti kopesana mbote ya maboko lokola balingami kati na Nkolo, ezali malamau, kasi yo okoki nde kolinga moto oyo akoki kolingama te lokola? Yango nde Kiyungulu ya moto ya mayele. Wana ezali Molimo na Klisto kati na yo, kolinga baye balingi yo te, na bongo okozwa mbano ya Nzambe. Kasi, sikawa, soki ozali kosala yango lokola mokumba, wana ozali kaka na Kiyungulu te ... Omati bobele na esika ya mibale. Kasi soki olingi Ye mpenza na motema na yo mobimba, wana ozali kopema na nzela ya Kiyungulu ya moto na mayele. Mpe Yango ezali kosepelisa mposa ya moto ya bulee, na lolenge ete oyebi uta na motema na yo ete okoki kolimbisa moto nyonso, eloko nyonso, atako likambo nini esalemi. Azali malamau mingi, boye te?

... Alingaki ngai liboso  
Mpe Asombi lobiko na ngai  
Likolo na Ekulusu.  
Tokotambola kati na Pole, Ezali Pole kitoko,  
Eyaka esika matanga ya mamwe ya mawa ezali kongenga;  
Ngengele biso na mokolo mpe na butu.  
Yesu, Pole ya mokili.  
Tokotambola kati na Pole oyo, Ezali Pole ya kitoko;  
Mpe Ezali koya esika matanga ya mawa oyo elekisami na kiyungulu ezali kongenga.  
Ô, Ngengele biso na mokolo mpe na butu,  
Yesu, Pole ya mokili.  
Boya, Bino basantu nyonso ya Pole, bosakola,  
Yesu, Pole ya mokili;  
Na nsima bangonga ya Lola ekobeta,  
Yesu, Pole ya mokili.  
Ô, tokotambola kati na Pole, Ezali Pole moko ya kitoko mpenza;  
Ezali koya esika matanga ya mawa ya mawa ezali kongenga;  
Ô, ngengele biso na mokolo mpe na butu,  
Yesu, Pole ya mokili.

Bolingi yango? [Losambo elobi: "Amen." — N.D.E.]

Ô, tokotambola kati na Pole oyo, Ezali Pole moko ya kitoko;  
Mpe Ezali koya esika matanga ya mamwe ya mawa ezali kongenga,  
Ngengele biso na mokolo mpe na butu,  
Ezali Yesu, Pole ya mokili.

Nalingi yango mingi!

Kondima na ngai etali likolo epai na Yo,  
Yo Mwana Mpate ya Ekulusu,  
E Nzambe Mobikisi;  
Sikawa yoka ngai wana nazali kobondela,  
Longola masumu na ngai nyonso ... (Lekisa ngai na Kiyungulu, Nkolo, na nzela ya Liloba.)  
E tika ete banda lelo  
Nazala mobimba wa yo!

Bokanisa naino likambo yango, kolekisama na Kiyungulu na nzela ya Liloba: "Mobimba wa yo."

Na bomoi na ngai wana nazali kotambola na banzela ya molili,  
Mpe mpasi ezali kozinga ngai,  
Zala Mokambi na ngai;  
Tika ete molili ékóma pole,  
Longola nsomo na ngai nyonso,  
Kotika te ete nábunga lisusu  
Mosika na Yo.

[Ndeko Branham abandi koyemba na nse ya mongongo *Kondima Na Ngai Etali Likolo Epai Na Yo* — N.D.E.]

... na motema na ngai ya kolemba,  
 Pemela molende na ngai;  
 E tika molili ekoma pole,  
 mpe pangusa mpisoli ya mawa,  
 E tika ete banda lelo  
 Nazala mobimba wa yo!

89 Nzambe molingami, tolingaka koyembela na Yo, mpo ezali wana nde totalisaka mayaki na biso, mayánga na biso, liyangani mobimba, wana Ozali kopemela biso Liloba ya Bomoi. Tozongisi matondi mingi, Nkolo. Bongo na nzela ya loyembo oyo, yamba biso, Olingi kosala yango Nkolo? Yango nde mposa na biso, ezali ete tolekisama na Kiyungulu na nzela ya Liloba na Nzambe, totambola mikolo nyonso kati na Pole, Pole ya Nsango Malamu.

Mpe tondisa nzela na biso mokolo na mokolo na bolingo,  
 Wana ezali biso kotambola na Ebenga ya Likolo;  
 Tika totambola ntango nyonso, na loyembo mpe koseka,  
 Tondisa nzela na biso mokolo na mokolo na bolingo.

Kokisa yango, Nkolo. Pambola biso elongo sikawa. Tika ngolu na Yo mpe mawa na Yo ezala elongo na biso. Bikisa babeli mpe bato na mawa na mokili mobimba.

Totondi Yo mpo na Ndeko Coggins na mpokwa oyo, ete Otiki ye ábima lopitalo mpe ázónga na ndako na nzoto kolongonu. Totondi Yo mpo na makambo nyonso oyo Osali, mpe mpo na makasi na biso, tozali komiyoka tozongisami sika, sikawa.

90 Totondi Yo na mpokwa ya lelo mpo na mwa Liteya moke oyo ebukana bukana, Nkolo. Na—natalisi yango malamau te, kasi nabondeli, Nkolo, ete Óbongisa yango na miso ya bato, mpo bakoka komona mpe koyeba ntina na yango. Ozwa nkembo uta na yango, Nkolo, mpe tika tózala na lisosoli oyo, soki eloko mosusu te, ete tosengeli kobika na Lipa ya Liloba na Nzambe, oyo elekisami na Kiyungulu na Nzambe bobele mpo na bana na Ye. Ezali liyangani oyo etiami pembeni. Ezali mpo na moto mosusu te. Ezali bobele mpo na baponami na Yo, lokola mpo na ngombe-mwasi ya motane, mai ya bokabwani ezalaki bobele mpo na eyanganelo ya Yisalaele. Bongo, Tata, toyebi ete Lipa ezali bobele mpo na bampate.

“Ezali malamau te ete nakamata lipa ya bana mpe nabwaka yango na bambwá,”Yesu alobaki bongo.

Bongo na ngala na ye mwasi yango alobaki: “Iyo, Nkolo, ezali ya solo, kasi nabelemi mpo nakolia pumbulu.”

Mpe tozali komiyoka bongo na mpokwa oyo, Nkolo. Tolingi nyonso oyo Olingi kopesa biso, Tata, mpamba te tozali na nzala mpe na mposa mingi ya Yo.

Tika ete mposa na biso ekoma kino epai na Yo, mpe na bongo totondisama, mpamba te, Tata, tolingi kozala na mposa ya moyengebeni. Mpe Moto Moyengebene ezalaki Yesu Klisto, mpe mposa na Ye ezalaki ya kosala mokano na Tata, oyo ezalaki Liloba. Pesa biso yango, Tata. Tosengi yango na Nkombo na Ye. Amen.

Totelema sikawa wana tozali koyemba loyembo na biso ya bokabwani: *Kamata Nkombo na Yesu elongo na yo.*

91 Sikawa, na bisika nyonso wapi Nsango eyokani na mpokwa oyo , tika ete Nzambe azala na bino sikawa wana tozali kosilisa na libondeli. Tika ete moko na moko na bino, libanda kuna, nazali kolikia ete bosepelaki koyoka Yango lokola ngai nasepelaki koteya bino Yango. Mpe nandimi ete Nzambe ákotia Yango kati na mitema na bino pe Akopesa bino ndimbola ya malamau na yango.

Mpe bino baoyo bozali awa, baoyo batiaki bitambala na bango awa, nasili kotia maboko likolo na yango. Nabondeli ete Nzambe abikisa moko na moko na bino, moto ya bokono akozala te kati na biso, bomoni ndenge Nzambe na biso ayanolaka mabondeli.

Ntango tosangani elongo: “Bato oyo babengami na Nkombo na Ngai bakosangana elongo mpe bakobondela, na ntango wana Nakoyoka uta na Lola.” Alakaki ete akosala yango.

92 Boye, biso tokabwani te. Tozali bobele Moto moko; biso nyonso tozali se moko, kati na Klisto Yesu. Moko na moko azalaki kobondela mpo na mosusu; bondela mpo na ngai wana nazali kobondela mpo na yo. Mpe Nzambe apambola bino kino tokomonana lisusu.

Boye nandimi ete bokozala sembo ... bino baoyo bozalaka pembeni awa, bokoya awa na losambo kotala mokengeli na biso ya malamau, Ndeko Neville. Akosala bino malamau, Ndeko Mann ná bato malamau oyo bazali awa na losambo.

Soki ozali pene na Ndeko Junior Jackson to moko na basusu kati na bango na ekolo mobimba, na New York ná bisika mosusu epai basalaka mayangani na bango, kuna na Arizona mpe na Californie, kende kotala mangomba wana soki ozali kuna. Tobondeli ete bokozonga lisusu mpe bokopesa nzela na mokengeli ete ásungu bino mpo na koyeba mingi na ntina na Nkolo Yesu.

- 93 Nzambe ápambola bino sikawa wana tozali koyemba *Kamata Nkombo Na Yesu Elongo Na Yo*.  
 ... Nkombo na Yesu elongo na yo,  
 Mwana na mawa mpe bolozi;  
 Ekopesa yo esengo mpe libondisi;

[Ndeko Branham azali kosolola na moto moko na eteyelo — N.D.E.]

... Bima.  
 Nkombo ya kitoko (Nkombo ya kitoko), O ya boboto! (ya boboto!)  
 Elikia ya mokili mpe esengo ya Lola;  
 Nkombo kitoko, O ya boboto!  
 Elikia ya mokili mpe esengo ya Lola.

94 Wana ezali ngai kotala kati na eyanganelo, nazali komona Ndeko Estle Beeler kuna na nsima, Ndeko Palmer, ná bamosusu, Ndeko J. T., mpe batei mingi oyo batelemi zongazonga awa, nakoki kobenga bankombo na bango nyonso te. Nakosepela kozala na bino, moko na moko awa, bongo bino nyonso boloba maloba ya bokabwani na losambo to bosala eloko moko. Bososoli, boye te? Nayebi ete bozali na motema ya Baklisto mpe boyebi ete tosengeli ... ndenge to—ndenge tozali; tozali na bomoko kati na Moto moko, kati na Klisto Yesu.

Sikawa tókanisa maloba oyo elandi, lokola tozali koyemba yango, wana Ndeko Martin awa akobondela mpo na kobimisa biso. Mpe nalingi ko ... Oyo ezali Ndeko Earl Martin, nabanzi, auti na Arkansas to—to na Missouri. [Ndeko Earl Martin alobi: "Missouri." — N.D.E.] Missouri, na ndelo mpenza ya Arkansas ná Missouri kuna. Bazali na Losambo moko kuna.

Mpe namonaki ndeko mobali mosusu oyo auti kuna na nse, nabosani nkombo na ye, Brewer. Azalaki awa na ntongo ya lelo. Nabanzi azali naino awa na mpokwa oyo. Iyo, namoni ye atelemei kuna, Ndeko Brewer. Mbala mingi nalaká bango koleka kuna mpo na kokaba masambo na bango na maboko na Nkolo, Nakokende kuna mokolo moko soki nakoki, na lisungi ya Nkolo.

Sikawa, wana tozali koyemba eteni oyo elandi.  
 Tokogumbamela Nkombo na Yesu,  
 Tokofukama na makolo na Ye,  
 Na Lola, tokolatisa Ye motóle ya Mokonzi na bakonzi,  
 Ntango mobembo na biso ekosila.

Toyemba yango sikawa.  
 Tokogumbamela Nkombo na Yesu,  
 Tokofukama na makolo na Ye,  
 Na Lola, tokolatisa Ye motóle ya Mokonzi na bakonzi,  
 Ntango mobembo na biso ekosila.  
 Nkombo kitoko (Nkombo kitoko), O ya boboto! (ya boboto!)  
 Elikia ya mokili mpe esengo ya Lola;  
 Nkombo kitoko, O ya boboto!  
 Elikia ya mokili mpe esengo ya Lola.  
 Ô, kamata Nkombo na Yesu elongo na yo,  
 Lokola nguba liboso na motambo nyonso; (boyoka sikawa)  
 Ô, soki masenginya mazingi yo, (osengeli kosala nini?)  
 Loba bobele Nkombo mosantu wana na libondeli.  
 Nkombo kitoko, O ya boboto!  
 Elikia ya mokili mpe esengo ya Lola;  
 Nkombo kitoko, O ya boboto!  
 Elikia ya mokili mpe esengo ya Lola.

Togumba mitó na biso.  
 Ô Nkombo kitoko, Ô ya boboto!  
 Elikia ya mokili mpe esengo ya Lola;  
 Nkombo kitoko (batisa kati na Yango; bondela kati na Yango), e ya boboto!  
 Elikia ya mokili mpe esengo ya Lola.

Ndeko Martin. [Ndeko Martin azali kobondela — N.D.E.]



[www.messagehub.info](http://www.messagehub.info)

Mateya eteyami na  
**William Marrion Branham**  
"... Na mikolo ya mongongo..." Emoniseli 10:7